

Pa'pakahajikang batattana

Sanna' ballonamo kamunnina inni pammarentata nasaba' lohe-mi pambangungang ri desa-desaya. Ri kabupateng Bulukumba rie'i 31 desa nataba pa'bajuang batattana beru.

Lohe desa ri Kajang angnguppa batattana beru ri desana. Se're desa nu'bajua batattana pannumolongang ambani iamintu ri desa Bonto Baji', narie' rua annorang beru nihaju iamintu pa'polongang battu ri Sengka Tallu ri dusung Pannololo mange ri Balabasa ri dusung Balo-balo. Labbunna 720 metere. Naia maka ruaya ri dusung Batu Menteng na labbunna 800 metere.

Nupoko' anjamaya iamintu niare' LKMD (*Lembaga Kesejahteraan Masyarakat Desa*, iamintu Kalompo'na Kaporeang Rajja' ri Desa), na inni lohena iamintu sampulo antallu tau nipungkahai ri Abdul Azis.

Hattu napammulaang anjama iamintu ri tanggala tuju bulang sampulo anse're na nanisare angga hattu anjama iamintu tanggala ruang pulo bulang sampulo anse're. Naia banyarangna batattana berua iangase'na ruang bilangang limang pulo juta rupia. Lanapajama tukung batu annang tau na pajama kassara annang pulo tau, mingka anre' nasikali nipajama, battuangna nipokokang tau natabaya kokonna batattana. Iajia punna niparalluangi nampa nasuro ngase' anjama.

Sikura pa'pagajina pajamaya? Panggare'na Abdul Azis nakua: "Injo tukang batua siallo 25.000, naia pajama kassara ta'siallona 17.500 rupia." Apa injo natabaya kokonna



annorang beru nihajua anre'ja nanggera sambe pa'banyara? Se're tau nataba kokonna annorang beru iamintu niare' iBakri ammantang ri Kampong Baru desa Lembanna. Napa'guru iareka angngajara ri SD281 Sumalaya nakua: "Sanna' sukkuru'ku lantarang natabana kokongku bajung annorang beru, manna mammo anre' sambe pa'banyara'na. Cobanna anre' annorang a'tarrusu antama' ri kokongku, sanna' to'i sessaku a'dakka antama' nasaba' anre' na'kulleki a'motoro iareka a'dongko' oto mange ri kokoa." Mingka nakua: "Rie' annorang battuangna lohe kalabbiangna:

1. Anre' nasessa taua punna a'lampa nihoja lamung-lamunga nasaba' anre'mo na ki'dakka antama'.

2. Punna rie' assele'na kokoa na lanierang amminro, anre'mo na kilannyompo, a'kullemi nigandeng.

3. Punna rie' i lanibalukang tanaya a'kulle to'i asuli' ballinna, nasaba' nikua rie'mo batattana, na a'kulleki ampaenteng balla' ilalang."

Na ri iangase'na pole taua nuambania kokonna kunjua a'ra' ngase'ri nihajuang batattana, a'betta-bettaengi angkua: "Pakunnimi ri kokongku anumolong." Mingka nihoja to'ji ia nusirattanga nihaju battuangna nihojai ri lambusu'na.

[nipatarrusu ri lahara 5]

Matei Haspina nihuntulang ri buhunga

Haspina binti Goreng guru SD. Bangnginna juma' tanggala karua bulang sampulo anrua 2005 lanarapi'i tette' karua Pina angngera doi' sisabbu rupia. Nikuta'nangi ri buru'nenna: "Apanuhalli sisabbu rupia?"

A'pihali Pina: "La'lampaa ammali ile pa'risi ulu nasaba' pa'risii ulungku." Pa'pauna Pina toje' pa'risi ulunna nasaba' loko' i ulunna, sappi tolinna, lo'loso susunna pimbali.

Pina, kajariangna bahine battu ri Karaeng Alla-taala, namminro mange ri Karaeng Alla-taala. Kareba labbu bicaranna pamasse nyaha. Sibanggi bujuru lampana iPina, anre' todo' namange anghojai, baganna rie' ana'-ana'a mange lanrio nampa naitte raha ri buhunga. A'paumi ana'-ana'a angkua: "Hebbereki! iPung Pina a'dabbung ri buhunga!" Turung ngase'mi taua mange anghojai, nampa naung taua napanai' nierang ri balla'na, tallasa nansulu' ri balla'na tumatea, matemantama' ri balla'na.

Balla'na tumatea mange ri buhunga labbi sibilangang metere kapang. Lantena tumatea ri balla'na rie'mo a'lampa a'keo' pulisi na dottoro angkua: "Naungki ri Batu Asang nasaba' rie' tumate, pa'kapang tau lohea mate nihuno."

Rie' ngase'ri pulisia battu ri Tanuntung a'rurung dottoroa naparessai haji'-haji' saggenna napau: "IPina mate nihuno, nasaba' loko' ulunna ri boko pa'sabakeng pa'peppe."

A'lampami pulisia nahoja kunjua ri buhunga si'raka matenapa nampa naerang mange nabuang ri buhunga. Lantena kunjua rie' nalabasa rara ri ruku'a iami injo napinahang a'tarrusu raraya saggenna nalabasa pammuno-

angna taua. Kamateangna Pina labbi kurang kapang tallu bilangang metere battu ri balla'na na labbi kapang limang pulo metere battu ri jera'na Unding, urangna siana'.

Konjo ri kamateangna naupai sandala'na Pina siurangang balo'-balu' sulapa' appa'. A'kuta'nanga ri buru'nenna iamintu Arifin jamaangna guru sikola SD: "Hattunna a'lampa bahinen-nu nupinahangi nasaba' lantang bangngimi, anre'pa namminro?"

Nakua buru'nenna: "Anre', ka injo bahinengku biasa-biasa manto'ji nai-nai balla'napanaiki, konjomi intu ammene-mene saggenna tinro. Na biasa punna tinroi na nironrong, larroi."

"Mingka parallui kedde' nissime' antere'i balla' atinro, punna a'nassaji nampamako amminro punna malla'ko anronrongi. Maka rua, nuisse'ji angkua bahinennu rie' garringna, anre' narie' ri atinnu si'raka tala nakullei naparrang pa'risi ulunna nammenemo ri annoranga iareka a'dabbungi?" Nakua: "Anre'."

Iami inni saba'na saggenna pulisia a'geo', maka se're naalle buru'nenna hattunna tumatea nierang mange ri jera'a nikahangang, najagai, anre' issengangna bakanga rie' a'baju pasisalaang maka rua.

Kamaccaangna pulisia anghojai ma'tungka tau ammunoa, allonnaji sattu tanggala sampulo antuju narie' pangngamu'na tunggakangna pammunoang. Allonna aha' nijakkalami tau nuniare'a anggakang pammunoang iamintu Amir Haro' gurunna SMPN Batu Asang, Amiruddin bin Bala' ri Karasing, na Rasid bin Dendeng ri dusung Bonto Manai' desa Singa. Kareba ta'lele battu ri

taua angkua: "Amir Haro' nagunaii tau ruaya doi' anghunoi Pina." Amir Haro' nikamanakangangi ri Pina, sompo sikalii anrongna iAmir na Pina.

Mingka apa saba'na na'kulle kamanakangna to'ji anghunoi? Iami inni parallu na pa'nassa pulisia. Rie' angkua labbi lohemi inrangna iAmir. Rie' todo' angkua labbi lohemi inrangna iPina ri Amir. Rie' angkua maengi a'talipong iPina mange ri Amir na bahinenna antarimai. Nakua bede' bahinenna iAmir: "Apa, puang Pina, lakibanyarami inrangta?" A'pihali larroi bede' iPina a'beserei lalang talipong. Iami inni na sangnginga'besere buru'nenna.

Gitte rupa taua lamate ngase'jaki, mingka kamateangna Pina anre' nisanna-sannai na pacce sikali. Antere' pa'kua palakara-ya inni? Iangase' nummunoa rie'mi ri balla' sessaya. Apa maengi a'dalle'ri mejang moncong? Kareba battu ri Bulukumba, anre'pa namaeng nikuta' nang ri Jassaya iareka na panggade-lang Bulukumba. Palakara kattappukang tarungkuna, mangelamange ang laniukiriji pole.

Anre'pa nakasabbiang sikura napa'gunaang iareka na anre' napa'gunaangi. Kitajangmi, puang, kasabbiangna sinampe' battu ri pulisia. Araki pa'tojekii kareba napanaunga *Tribun*, saba' gitte ri Sulawesi Selatan rie' nikua hukung siri'. Ara laloki sihunoi bicara, labbipaya sihunoi kamateang. Sabbaraki, puang, kipihalii ri sura' kareba. Nakke anre' kupannabai piti a'kapau-kapau, pa'maraengi kareba ri Jaha na kareba ri Sulawesi.

Andi Mattaisseng, Herlang

Bonto Tiro angnguppa pa'tulung 1,4 miliaru rupia

Pa'sambe bupati Bulukumba Drs H. Padas, MSi. tala malling allalloa ri kantoro desa Tritiro a'dahu pa'tulung mange ri tau tabbalaya ri kacamatang Bonto Tiro. Pa'tulunga injo battu ri pammarenta Poropensi Sulawesi Selatan. Nunadahuanga pa'tulung iamintu 632 pammanakeng nibage anjari limang pulo antuju pa'geokang, padai pa'tulung modala (doi') mange ri lima pa'se'reang jamaang a'kiassele. Tala malling allalloa maeng to'i a'dahu masina lopi sampulo batunna mange ri papanjaya ri pa'rasangeng Para'-para'.

Pa'tulung nunadahuangi iamintu doi' lohena se're miliara patang bilangang juta rupia. Injo doi'a lanipake mange ri jamaang nu'kullea lampasagenai tau tabbalaya, ibara'na: pa'pangngajara kacaraddekang mange ri taua, pa'tulung modala mange ri

padangganga, pa'kakkasa jama-jamaang, a'pakahaji' annorang, a'pakahaji' pasara, na a'pakahaji' sampulo batunna balla' tau kaasi-asi, antama' to'i pa'pakahajikang pa'taiang na pa'janna-jannaang.

Pa'pauna Padas ri dallekangna tau tabbalaya na ri pammarenta iangase' desa Bonto Tiro nisabbi ri Andi Bau Amal battu ri bageang kareba pammarenta kabupateng, rie' to'i cama' Bonto Tiro, na lohe to' kapala kantoro battu ri Bulukumba, ibara'na kantoro anjagai kampong (*Bawasda=badan pengawasan daerah*), kantoro pa'naha-nahaang pambangungang kampong (*Bapeda=badan perencanaan daerah*) na kantoro pa'lamungang modala kampong (*PMD=penanaman modal daerah*).

Nakua Padas: "Inni pa'tulunga bara' a'kullei nipa'matumu na napisa'ringi ngase' tau

tabbalaya. Talia juku' nidahu-angki, mingka pekang. Ka punna juku' maengi kikanre labbusumi, mingka punna pekang a'kulleki pole mange ammekang punna labbusui juku'ta.

A'pada to' injo pa'tulung battua ri pammarentata nidahu mange ri tau kaasi-asi lantang (*kompensasi BBM*), kipakei mange ri nu'matu-matua. Doi' nidahuangaki inni anre' na'kulle nipahalli bahanggi kanre, mingka kipahallii nu'kullea a'kiassele na labbu kipisa'ringi. Punna balloi bateta ampakei pa'tulunga inni na'kulle sagena katallasangta sallo', iami injo naminasai pammarentata na nadahuki pa'tulung." Katappusangna minasana Padas bara' taung ri boko rie' pole pa'tulung battu ri pammarenta ratea.

[battu ri "Panrita Lopi" XI]
MCardaP, Makassar

n • w pdS: AN pŠœq br
a • el A NpmŠ-mŠ n nPsRQ
qes ta t bl y. t Ly —•
NsœwK, Mk epkq. k tn
—• mea Q Kker l †j M, Mk tn
epkq a • el K poel meq a emkq
tn l †j W —• t .
apd to Aj o pŠœq bŠw R
pmer tt Ndœw meq R t ÿ kS-
a S l tq kSa, KpekA meq R
EmŠ-mŠw. doA Ndœa qK AN
aer n • el NphL bhJ ker, Mk
KphLA œ • el a aKa esel n l †
KPsRQ. tn bl o bet t ampekA
pŠœq AN n • el segn kt l st
sl o, AyM NMnsA pmer tt n
ndœK pŠœq.

Battu ri Jannang Karebaya

Sikidi na sikidi anjari lohe sallo'

Sura' Kareba Bulu' Kuuppa nampami sitaung amuru'na

Pa'pada maengki kupa'nassaang ri bungasa'na ansulu' Sura' Kareba Bulu' Kuuppa (SKBK) taung riolo, inni panggaukanga **"Battu ri tau Konjo assala'na na nihaju ri tau Konjo to'ji bonena na mange ri tau Konjo pa'tujungna."**

Toje'i pa'paua. Punna talia tau Konjo, ma'nassai tala rie' SKBK, nasaba' gitte **tau Konjo assala'na**: basata, ada'ta, kasabbangta, pasilalongangta, na allo ribokoangta todo'.

Nampa pole, SKBK **nihaju ri tau Konjo** to'ji bonena, bottina pila' malling pila' lohe tau Konjo angnukiri ri sesena kareba desana, pangnginyarangna, pikkirangna na maraengangna pole. Kulle kapang su'rung kunni-kunni labbi ruang pulo allima tau Konjo maeng ampago'e'i potolo'na angnukiriri pikkirangna.

Na inni pole, annaba to'i angkua **mange ri tau Konjo pa'tujungna** SKBK, nasaba' tala rie' pa'tujung maraeng naia gitte tau Konjo a'kulle angnupai bulu' nuniitteji ri tau maraeng, iamintu a'buabuang kasagenaang.

Lohe panggaukang, antama' to'i anunna pammarentata kapang, nihaju na lohe rupia nipansulu': kantor, oto, tau nipagaji. Pa'tujung lompo, pa'geokang lohe, pansulukang doi' sanna', manna pa'dibokoangna anre' na'nassa. Nakke ngase' ri jannang kareba SKBK, maraeng kapang bateku. Ammulai caddi na punna sura' karebaya ningai ri tau Konjo, a'bakka'i.

Ana' a'pilajara kalolo' rolo', nampa a'dakka, nampa pole ribokopi anumari. Padaji SKBK. Taung nullalloa sumpae' pinggappa'ji ansulu'. Rupa'na taung beru 2006 inni, pinsampulo anrua. Bulang katappusang taung riolo (12-2005), nampami kutimba' kantor'na ri tana Konjo, iamintu ri Jannaya, desa Lembana, Kajang. Manna pa'tujungna ta'timba'i anna'a tette' karua aggenna tette' appa'



allonna sanneng sanggenna allonna juma', anre'pa pakunjoi. Mingka sakulle-kullena ta'timba'i antarimaki. Mae saki antoa'i kantor'na sura' karebata to'ji.

Punna rie' karebata nutingang maengki angnukiri, a'kulle pajamaya tappa' ampantamakangi ri komputerea. Iareka kunjoi kinanro karangangta, iamintu ri kantor SKBK ri ampi'na pengka appa' na ri tubua. (Punna ta'tongko'i kantor, kinanroi ukirangta ri balla'na puang Bachrum ri ampi'na.)



Lohe buangng poko' kaju a'bilangang taung a'bakka' nampami nipisa'ringi matu-matunna anjari papang. Kulle kapang mallingiji SKBK nampa a'bakka'. Mingka

matu-matunna ita' na kilapisa'ringi. Sampang ansulu' SKBK, hallimi se're na kierang amminro ri balla'ta bajung bacaangta sibatu bija.

>>Angngukiriki karangang na kiuppa pa'rannu-rannu iamintu doi'. Taliaji injo, nasaba' paranta Konjo angnuppa todo' iamintu kasageang a'pilajara ri sesena pikkirangta.

>>Ammaliki SKBK na kiuppa pa'nassaang ri sesena tallasa allo-allo nusagenaya. Taliaji injo, nasaba' SKBK angnuppa todo' pa'tungkulu'ta a'bakka. Saggenna labbusu nukupa'sadiaya, anjariki palanggang (pillimangji na sampulo sabbu rupia), na kusarengki tanggala taung beru 2006 inni.

>>Pa'bojaanga pahalli SKBK na paukiri'na todo' na malling-malling angnuppa sura' kareba nutaliaji akalolo', mingka a'dakka haji' nampa la'bakka anumari todo' sallo'.

Rupa'na taung 2006 na allo pa'lappasa kalerajata ballo ngase'.

Mange ri iangase' kapala desaya sibatu Herlang

Sikura lohena tau sibatu Bulukumba napisa'ringi nyamangna kasannangang pambangungang daera Bulukumba mange ri desaya a'poko' ri a'pakahaji' batattana beru nihaju. Pammarenta anre'mo nasannang atinna ampikirii rajja'a apasse naparalluang nidallekanga. Lohemi tau a'baju balla' ri biringna batattana berua. Lohe todo' tau angkua: "Dalle' lompoa nasareanga pammarenta nasaba' kokongku nataba annorang, lohe nataba pa'ballakang tinggii ballinna manna mamu batu karumbang iareka na batu kanre." Pila' mangena taung na pila' katambaang pangnguppaangna pammarenta battu ri tanaya. Ebara'na rie' tau ammalli pa'ballakang, a'nassami nasuro palentana arengna, nasuro dattarai ia ta'areng ri bo'-bo' pambanyarang sima tana (PBB).

Iami injo sihessu-hessui sahala'na rajja' na pammarenta ri sesena:

1. Dalle'na rajja'a lomoi pamangeangna ri kokonna nahoja assele lamunglamungna, siurangang lomoi naerang amminro ri balla'na nasaba' antama'i motoroa siurangang otoa.
2. Lomoi pasiitteangna na tau ammantanga ri desa maraenga punna rie'

kokonna nataba batattana, rajja' iareka na pammarenta.

3. Katambaangi pangnguppaangna pammarenta balanja pambangungang nidallekanga battu ri pasitekengna tu'balu' siurangang tau ammalli pa'ballakang siurangang pa'banyarang sima tana.

Pa'banyarang sima tana siurangang sima bangungangta igitte rajja'a ara laloki mallingi a'banyara sima, nasaba' doi' pa'banyara simata napa'se're pammarenta napanjari kaparalluang tau tabbala.

Sangnging napau cama' Herlang: "Manna nipa'se're sima rantea, sima bangungangna rajja'a sibatu Herlang ilalang sitaunga anre' naganna' balanja pambangungang batattana, mingka rie'mo lanitambai doi' pa'sare ri pammarenta ri Jakarta. Ebara'na sima rantena kalurahang Tanuntung labbiji ruang pulo juta rupia angnupai pambangungang kasagenaang rajja' ere tangkasa (sumur bor) balanja na labbi ruang bilangang juta rupia. Naia ere tangkasaya se're kabattu-ang kagassingangna rupa taua."

Kupanaungi ri kareba Bulu' Kuuppa na'kulleang nabaca kapala desaya sibatu Herlang na'kuta'ng ri lura Tanuntung:

"Antere'i pakua lingkana na'kulle angnuppa balanja pambangungang ere tangkasa battu ri pammarenta daera?"

Ri desa Borong se'repi dusung anre'pa namaeng angnuppa pa'sare pammarenta balanja buhung nikeke iamintu dusung Sappang. Na punna antama'i bulang salapang sanggenna bulang sampulo anse're lohemi tau angninung tangnga anrio-rio tangnga angninung. Sitoje'na ri bulang tallu 2004 paukiri'na daera A. Mappigau Samma natarimai pangngenera na tau lohea passala ere inung battu ri buhung nikeke. Iami injo na mannamo isse' Mappigau a'lentami battu ri Bulukumba, mingka jamaangna, iamintu paukiri daera, anre' na'lenta. Rajja' dusung Sappang desa Borong Herlang anre' ammarina natajang kabattu-angna, nasaba' ta'bulu' maengi nabicara konjo ri masigi' Babul Hikmah Jatia. Haji'na pambangungang annorang desaya, ballo ngase' ere tangkasa'na rie' to'mo.

Na inni pole: taung balanja 2004/2005 desa Borong anre' nangnguppa pambangungang battu ri pammarenta daera. Rie' pa'kuta'ng, angngurai ri desa maraenga sibatu Bulukumba massing rie' nauppa balanja pambangungang? Ri desa mara-

Patanggong:
Yayasang Bulu' Kuuppa
Kotak Pos 1419
Makassar 90014

Pammanralang:
CV Adi Perkasa
Jalan Talasalapang
Ruko BPH Blok 0-1 No.B
Makassar 90022

Kasampangang anjama: paukiri

Sura' kareba **Bulu' Kuuppa** a'boja tau angnukiri na basa Konjo. Kasampangangna tau antama' iamintu napalantei pa'pau ri sesena nunjaria ri desana aggenna kacamatangna iareka pantarang pole.

Nunihojaya iamintu taliaji tau macca a'karang, mingka tau nusadia a'kulleang na a'pilajara a'karang. Ri maengnapa ga'ra sikura hatu nampa nipa'se're niajara ri sesena antere' pakua bateta a'karang. langase' tau nu'kulleanga a'karang lanisarei pa'rannu-rannu sikiddi iamintu doi'. Na ri sesena tau numacca a'karang iareka a'kulleang na ballo, rie' pasikapangang nipagaji sallo'.

A'pikatunaki sura' mange ri kantorona **Bulu' Kuuppa** na kipau arengta na pammantangangta, na apa kasabbangta iareka pa'tujungta a'karang. A'basa Konjomaki.

Panggera popporo!!!

Jannang kareba Bulu' Kuuppa angnegera popporo ri cama' Kajang, Abdul Wahid Jalil, na ri gitte ngase' pabacana sura' kareba inni ri sesena ukirang "Larie' cama' beru ri Kajang." Tantumi kareba injo sala. Pa' cama' Kajang ronggoji na sadia anjampai tau tabbalaya ri Kajang a'tarrusu.

A'pilajarama a'paresa kabattu-ang nukupa'talaangki. Biasa rie' tau kalenna to'ji pantama' ri sura' kareba maraenga. Jako pakunjoi kedde' ri SKBK.

enga, rie' angnuppa balanja pa'pakaterasa annorang, rie' angnuppa balanja buhung nikeke, rie' angnuppa balanja pa'pakahaji' sikola, na ri pantarangangnaya pole. Angngurai desa Borong?

Kupa'se're pa'kuta'ng battu ri taunna desa Borong, iamintu:

1. Angngurai desa Borong na anre' nangnguppa doi' pa'sare pa'tulung BBM. Ruang bilangang limang pulo juta rupia? Na desa maraenga angnuppa ngase'i.
 2. Angngurai desa Borong na anre' nangnguppa balanja pambangungang, narie' annorang beru nahaju battu ri dusung Sappang sitarrusu mange ri dusung Bontoa?
 3. Sinungka' anjarina kapala desa H. Muh. Yamin, anre'pa anjari pangngenera na mange ri pammarenta daera palakara katambaang pangnguppa-angna rajja'a. Angngurai, pa' desa?
- Kareba kupanu-ang situru' pangngenerana tau lohea mange ri pammarenta.
- Rupa'na kibaca haji'-haji' nukupau na kibalasa nusirattanga.
- Andi Mattaisseng, Herlang

Oto pete'-pete' ta'bale'

Ri allonna kammisi tanggala sampulo allima bulang sampulo anrua 2005 tette' se're ri tangngallona alloa, na kunjo ri Pa'langisang Ujung Loe kajariang oto pete'-pete' ta'bale' ri biring annoranga na allappo tembo' pantamakang ri dallekang balla'na taua.

Injo otoa niare' Carry Suzuki 1.0 lomoro pulisina DD1983U, tau ampadak-kai ai niare' Erwin amuru'na labbi ruang pulo taung ammantang ri Mallombong desa Tugondeng Herlang.



Lohena lurangna appa' tau, na se're nuloko'a niare' iBacce' amuru'na labbi todo' ri limang puloa allima taung, na rupanna loko' tallu panjai'na.

Apa ammula-mulana nata'bale' otoa? Pangngare'na tau sabbia nakua: "Injo otona iErwin sanna' todo' batena anumari, mingka rie'i otona niare' iAmmang angngondang battu ri boko, battuangna sanna' todo' batena anumari, na anjariangmo a'pasiondang iareka a'pa'rembaangi otona numari."

Mingka ri hattunna a'remba na massing anumari sanna'mi, nakua iErwin: "Rie'mo oto lombo na motoro battu ri dallekang, tappa' naalle to'mi annorang dallekang otoku, sanggenna sikai' bang otoku na bang otona, nasaba' pada-pada'i bang radial kupake battuangna bang bodobodo mingka nulabba' sanggenna nalallo ansulu' kalenna otoa. Na kai'na bang otoku na naallemo annorang otoku pole tappa' a'dappo'mi nakke otoku ri biringna sapala'a. Alleang ata'bale' battuangna sa'ringna a'bisossoro ri batattanaya, na iapa nammantang bunganna allappo tembo'."

Rie'i ruang jang maengna kajariang na nampa rie' to'mi pulisia battu ri Bulukumba appa' tau lamparessai saba'-saba'na nata'bale' otoa, na nasuka' pammulana sientos' na alleang ata'bale'. Nursalam KJ

Rua pungkaha KUD/KUT nitoana ri balla' sessa

Ilalang Bulukumba sampulo kacamatang, sibilang anruang pulo lima desa maeng ngase'i angnguppa doi' pa'tulung battu ri pammarenta nalalangi *Koperasi Unit Desa KUD* (pasitulungang ri desa), na ta'se're KUD a'bjui kalompo' niareng *Kredit Usaha Tani KUT* (pangnginrang doi' ri pakoko/pagalung). Iami inni a'bjui urang pa'se'reang pajama koko. Pa'se'reang pajama koko rie' pungkahana, rie' paukiri'na, rie' todo' pa'bage doi'na. Pungkahana pajama KUD massing angnguppai doi' pa'tulung battu ri pammarenta ta'se're miliara rupia. Naia pungkaha KUT massing angnguppai doi' pa'tulung ta'ruang pulo allima juta rupia. Punna anreka na kusala pangngurungi taung 1998 massing a'tarimami doi' pa'tulung ri pammarenta.

Iangase' pajama koko rannui, nasaba' nakua pammarenta nakamaseangi rajja'na nasare doi' pa'geokang ambalanja'i lamung-lamungna na kulle so'mo' na lohe assele'na. Annorang pa'geokangna pungkahana na kulle angnguppa doi', naukurii arengna urangna siurangang naallei panrala karatuna (*fotocopy KTP*) nampa a'kulle a'tarima doi'.

Ri hattu kaissengang angkuwa maengmi a'tarima doi' pungkahana, massing a'ta-

Pa'pakahajikang alahana Dato Tiro

Lohemi kalabbiang niitte kamun-nina, rie' to'mo pa'pakahajikang sikola, batattana, kantoro na inni isse' pa'pakahajikang alaha pangngahangang.

Pa'pada ri Hila-hila Bonto Tiro ri pangngahangangna Dato Tiro maengmi nihajuang alaha tembo' a'tammu, ilalang to'mi alahana panrio-riongna siurang nihajuangi rabrang pa'ta'meaang sollanna anre'mo nasambarang taua napa'ta'meai iareka napa'pasambeang baju.

Numpakahajikiai iamintu kantoro annulung tubattu-battu (*Dinas Pariwisata*). Kabattuangna doi'na battu ri pa'banyara'na to'ji tau numangea.

Riolo punna rie' tau amange, anre'ja ki'banyara, a'sidakkataja mange ri tu'bacu-bacaya. Mingka napikkiri pammarenta angkuwa punna anre' nipa'pakahajikii a'nassami angkuwa kodi niitte, na nampa anre' na'barakka' pole ri kabattuangna taua. Sanggenna rie' pangngatorang battu ri pammarenta angkuwa, punna rie' tau a'lampa a'siara ri pangngahangangna Dato Tiro, a'banyarai ta'lina sabbu rupia se're tau. Injo lima sabbu lanibage-bage to'i, rua sabbu lamange ri kantorua na tallu sabbu mange ri pungkaha pa'jagana.

Pangngare'na se're pa'jagana ri bageang karattisia (*karcis*) Hajja Sabbe nakua: "Injo gitte tallu sabbua nipa'se're na nampa punna ganna'mi sihulang nipa'nassami lohena. Maeng injo ka limaa nakke siurang nibanyara parasenga, iamintu ta'sampulo paraseng, labbinna injo napa'banyarangi to'mi ri lampunna masigi'a, kantoro cama'a na kantoro'na todo' yayasanga."

Narie' sura'na bupati AM Sukri nakua: "Punna rie' tau lamae a'siara, parallu nusare karattisi, na anre' na'kulleko a'pasimmaraeng tau, manna inai-inai." Nursalam KJ



jangmi lanibagei doi' urang-urang pajama kokona. Lohe urangna a'kuta'nang: "Sikuraya pungkahana nibagei doi'a?"

Lohe buangang pa'pihalinna pungkahana. Rie' angkuwa: "Anre'pa nibagei nasaba' anre'pa kutarima ngase'i, nasaba' a'bila'-bilangangi pungkaha pajama koko, antere'mi mae pungkaha KUDa. Anre' nakullei banga sikali nabanyara."

Rie' todo' angkuwa: "Nakke anre'pa kutarimami." Rie' todo' angkuwa: "Maeng ngase'pi a'tarima pungkahana KUT na KUD, nampa a'pansulu' parenta angkuwa bagemi doi' nutarimaya, nampamaki a'kulle angkeo'ki a'tarima doi'."

Pa'sabakeng ngingirimi urang-urangna a'tajang pa'keo' pungkaha la'tarima doi', nasaba' lamung-lamungna pajama kokoa pupukangnami, saggenna rie'mo urangna a'parrang nai' ri kantoro bageang KUD ri Bulukumba a'kuta'nang: "Anre' mintodo', puang, namaeng a'tarima doi' pungkaha pa'se'reang pajama kokoa?"

Pa'pihalinna kapala kantoro bageang KUD Bulukumba angkuwa: "Maeng ngase'mi a'tarima, anre'mo ammantang."

A'jamma'i pajama kokoa angkuwa: "Rie'pa beded' parentata angkuwa bagemi doi' nutarimaya na nampa nabage mange

Tau a'racung kokonna; olo'-olo' mate

Ri bangnginna juma' tanggala sampulo bulang sampulo anse're 2005 narie' jarang amate limang kaju na sikaliji, iamintu ri Luraya desa Bonto Baji' Kajang.

Mula-mulanna injo olo'-olo'na taua nangai mintodo' sangnging antama' ri lamung-lamungna taua nisabbu'mi angkuwa ri lamung-lamungna iRuha' amuru'na patang pulo taung ammantang ri Luraya.

Sanggenna ri hattunna la'racung napauangmi pasiampikang balla'na iamintu niare' iTaja'. Mingka injo iTaja' nutala rie' olo'-olo'na na nampa pole nugarringi, iami injo na anre' na'lampa napauang iangase' nurie'a olo'-olo'na.

Sanggenna allabbiangmi racung ri kokonna iareka ri lamung-lamungna, na tangnga bangngii antama' ngase'mi isse' jarangna taua limang kaju a'rurung-rurung. Sanggenna ri tette' sampulo anrua ri bangngia amminromi injo ana'na jarangna ri dallekang tuka'na to'ji patanna, iamintu niare' iSannai, na anrapa-rapa.

Alleang samaturungmi sibatua balla'na nakua: "Angnguani inni jarangna?" Na tala narapikang to'mo nailei alleang amate. Sanggenna nakua: "Hojai sai anrongna rolo', ante'i mae a'lampaia."

Nahojana anrongna ri kokonnami injo iRuha', na naitte pole jarang lombo sikaju mate mingka taliapa anrong jarangna, mingka niare' jarangna iRasyid. Nanampa a'dakka pole antamakang sanggenna naittemi anrong jarangna pole amate.

Naia jarangna iRasyid, pangngare'na rie'mo maeng angngerei pahalli rua juta angngannang bilangang sabbu rupia na teapi nabalu', mingka pakua'mi injo punna nikua dalle'. Na injo nuruang kajua massing-massing napataia iUddin na Sutung, iangase'na ammantang ri Luraya.

Sanggenna ri tette' se're nalallo tallung pulo mani' rie'mo tau annaruru'na mange ri balla'na ipa' desa iamintu Akhmad M., na nasuroi pa' desa mange angngitte pa'jari-anga, iamintu ri tette' rua ri bangngia, naniurang ri tau toana iamintu ri puang

Maha.

Ri battunamo kunjo ri pa'jarianga, na massing nakeo'mi taunna, manna tau nummanrakia ia to'ka na tau nuni-panrakia, iamintu ri balla'na iSannai.

Ri rie'namo a'se're namassing nikuta'nangmi ri pa' desa angkuwa: "Ikau tau rua-rua, battuangna tau ammanrakia na tau nipanrakia, apa-apa intu mae a'ra'nu ngase'."

Nakuami tau nipanrakia ngase' nakua: "Inakke a'ra'ku ia, sambeanga ballinna olo'-olo'ku iareka jarangku," battuangna nakua injo ballinna rie' rua juta rupia, na rie' todo' labbi ri ruaya juta.

Mingka apa pa'pihalinna tau ammanrakia? Nakua: "Inai ansuroko tala nutambang olo'-olo'nu do'?" Battuangna anre' naa'ra' a'suluru iareka na a'tokkong.

Sanggenna nakua ipa' desa nakua: "A'pakunni, battuangna ikau tau rua-rua, iaka tau ammanraki iareka tau nipanraki massing rie'ko asala. Nasaba' nakua ikau tula'racunga angngurai na tala nupau rolo' ri turie'a olo'-olo'na angkuwa: "A'ra'a la'racung." Singkamua todo' ikau turie'a olo'-olo'na, angngurai na tala nutambang olo'-olo'na na nuisse'ji angkuwa lohe lamung-lamungna taua lanapanraki?"

Alleang nakua: "A'pakunni pale' battuangna injo, ballinna jarangna nipa'padami angkuwa rua juta rupia ballinna ta'sikaju, pakunjo ka massing asalaki. Battuangna nacidongi patanna olo'-olo' se're juta rupia na nacidongi to'i tau ammanrakia se're juta rupia, na nampa injo bakkena naalle to'mi patanna jarang."

Mingka apa pa'pihalinna iRuha'? Nakua: "A'ra'ja, mingka limang bilang-anggi sabbu rupia ta'sikaju jarang, na nuallemi bakkena."

Sanggenna rie' katappukang iamintu nabanyarai iRuha' tallu juta anang bilangang sabbu rupia, na angngalle to'i bakke sikaju iamintu jarangna iSannai.

Nursalam, KJ

Pa'painga' mange ri tau rie'a olo'-olo'na

Aramaki mangei annambang ri kokonna taua, padaya tedong, capi na jarang, kunjo ri koko nurie'a lamung-lamungna. Ka injo olo'-olo'a punna nitambang na rie' lamung-lamung, natekoloi tulu' iareka nalisa'i. Punna pakunjo amatei injo lamung-lamungna iareka sappai tangkenna. Sikura karugiangna patanna koko punna matei lamung-lamungna:

- ▶ a'tana'i tanaya na dokkongi lamung-lamungna
- ▶ matei lamung-lamungna iareka sappai
- ▶ rugi doi' (pupu' na palangnga' nihalli)
- ▶ rugi buku

Ia injo na kuera ri tau rie'a olo'-olo'na, araki annambang ri koko rie'a lamung-lamungna. Punna rie' lamung-lamung napanraki olo'-olo'ta iareka matei taua lamung-lamungna, na napanraki ri pammarenta, nipasokkongki. Maemaki na kimassing sabbara, kunjo to'maki annambang ri kokonta, punna anre' kokonta a'bojaki koko kulang.

Hamsia, Bontoa KJ


ri urangna, puang." Nakua kapala kantoro: "Ha' Anre' atorang kamua injo."

"Allabbiangmi karebaya sibatua Bulukumba angkuwa napanrakimaki gitte pungkahana. Rie'mi arenga ta'ukiri na potoa ri pammarenta. Haji'naja punna anre'ja naballasiki sinampe'. Lantarang kangoangna siurangang siri' atinna pungkahana anre' tangnga nahuntulu'na kadorakaanga ri tau lohea."

Kupanaungi nakke karebaya ri tau lohea, nasaba' kangoang siurangang siri' ati nakua pajama kokoa: "A'ceccemi nukunjo ri kalenna nasaba' iSyamsir bin Buleng ammantang ri Singa desa Borong Herlang siurangang Ali bin Haji' Sulae-

mang ammantanga ri Bonto Tangga Bonto Tiro napammulaimi ammantanga ri balla'sessaya Bulukumba tanggala beru bulang se're taung beru 2006. Kareba battu ri kantoro jassa Bulukumba angkuwa iangase' pungkaha KUDa siurangang pungkaha KUTa nummanrakia doi' nagara lantama' ngase'i a'balla' sessa na napainroi doi' nagaraya.

Andi Mattaisseng, Herlang



Pa'betaengang a' baca Kurang

Ri bangginna aha' tanggala ruang pulo anggappa' bulang sampulo anrua 2005 na' pakarammula a' pa'betaeng anngaji ri desa Bonto Biraeng Kajang. Nuntimba'a inni pa'betaenganga iamintu kalenna bupati AM Sukri A Sappewali siurang bahinenna. Lohena a' rurung, pa'sambe bupati Drs. H Padasi MSi siurang bahinenna, pa'sambena kapala kantor agama Bulukumba, na se're taunna pa'sambe raja'a H AM Juharta.

Pau-paunna bupati nakua: "Massing maemaki na kisipatang bara' kamuan-na nikulle ambaungi inni kampongta Bulukumba, nasaba' inai lampikkiri punna tania massing gitte todo' lalang Bulukumba. Inni pa'betaenganga a' baca Kurang battuangna a' ra'i nipa'botti angkua kunni ri Bulukumba a' nassa minto'i angkua anre'mo tau tala naisse' anngaji, nasaba' punna rie' ana' buru'ne iareka na tulolo labunting nutala naisse' anngaji, nisuroi rolo' a' pilajara na nampa amaccapi na nampa nipa'nikka."

Katappusang napau nakau: "Inakkemi inni ammarenta ri Bulukumba, mingka punna rie' kasalaangku iareka najama-jamaangku asala, battuangna igitte ngase'

intu mange a'kulle lampainga'a. Na rupa'-na ri sesena nuhaji'a a' nassami angkua lakugaukangi. Na tanrana angkua inni pa'betaenganga sanna' kukarannuangi, battuangna inai-nai sallo' lomoro se're desana lalang kacamatang Kajang laka-sarei doi' pa'rannu-rannu se're juta rupia."

Pa'paunna pa' cama', iamintu pungkahana pa'betaenganga, Drs. Abd Wahid Jalil mange ri dallekangna bupati nakua: "Inni pa'betaenganga lohena desa amminahang iamintu sampulo ansalapang desa na nunipa'betaenganga iamintu: anngaji na a'padidi', anngapele Kurang caddi, a'sare pa'pangngajarang, na rie' pole iamintu a'kelong-kelong (*kasida*). Inai-nai annguppa lomoro se're la'tarrusu a'lampa a'betaeng ri kabupateng kunjora ri Bonto Bahari."

Apa matu-matunna inni pa'betaenganga? Pangngare'na pa'sambe kapala kantor agama Bulukumba nakua: "A'kulle napasijarreki pole pasisambungangta ri sesena tau sallanga siurangang lombo pangngaa'rakangta ampa'gurui a' baca Kurang sollanna anre'mo nikua tau huta ri pa'bacaang Kurang."

Nursalam KJ

Lallomi hattu amminahang a'karang na basa Konjo ri ruang pulo anrua SMP/SMA ri sibatu tana Konjo. Ri bulang maka se'rea inni massing-masing assele nipa'se're na nipantama' ri komputere'na sura' kareba **Bulu' Kuuppa**. Maeng ngase'pi injo nampa nisare ri paranta tau Konjo nunipilea lambacai' na amparessa na ansare angka. Sabbara ngase'maki, ka pansulukangnapi isse' SKBK na nipa'pauang ri sesena sikurayapi na nipalabbang ri sesena karangang nukaminang haji'.

Ante'i pakua apia niuppa?

Apia mallingmi naisse' rupa taua, sipammulaangi rie'na rupa tau. Ri siku' lohena *liang* ri Eropa numaenga napammantangi tau a'sabbua taung allalloa, appusu na polong-polongang buku nunahajua appusu (using) niuppai ri alla'na batu-batua a'nassa nipake anjari pa'rarangang.

Mingka ante'i pakua taua a'pilajara a'baju api? Nampai nikapang-kapang. Kulle kapang turioloa naisse'i matumunna apia riolo nampa naisse' ante'i pa'kua a'parinra api. Ebara'na latte annora' batang kaju rangko na'kulle a'kanre batang kaju. Kunjomi naisse'i a'parinra api na nakatutui rinrana sanggenna a'taung-taung.

A'kullei nikapang-kapang tau ammantanga ri *lianga* a'pilajara a'parinra api. Ri hattu nalisa'na batu-batu langkaraya ri sassangna, ia bungasa niitte raci api batu ri batu se'rea annora' batu maraenga. Mingka lohemi tau ri anre'napa sala se'rena ri tau bungasaya inni anngisse'i angkua nipa'ruppaangi rua batu bara' annguppaji api.

Pa'kulle-kulleang maraeng anngisse'i ante'i pakua tau bungasa annguppaya api iamintu niitte-ittei tau rioloa kunni-kunnina. Lohe ri sala se'rena ilalang katambaang nuna-uppaya bohe-bohea rioloa a'sabbu-

sabbu taung allalloa.

Maemaki kiitte sai sikura lohena pangnguppa. Ri Alaska tau Indian batu ri se're kampong napasigusu'i colo' jaranga ri batu na napasitutu' injo batu. Na punna colo' jaranga injo a'kanremi, nabuangmi batu a'kanrea intu ri ruku'-ruku' rangkoa iareka numaraengangnaya.

Ri Cina na India pue korong nipasigusu'i ri takkang parring. Bukkuleng pantara'na parringa terasa na lohe batu apina. Tau Eskimo napasigusu'i kassi' biasa mange polong bassi nulohea ri pammantangangna. Na tau Indian Amerika Utara napasigusu'i rua takkang punna a'bajui api. Ia inni samara nagaukang taua.

Tau Yunani na Roma kunnia nahajua iamintu kaca nunaare'a kaca pa'tunu na napatarai ri sinara'na matanna alloa. Punna bambang alloa a'se'remi ri kacaya injo, sanna' hambangna a'kullei a'pakanre api.

Lohe tau riolo a'baju api nutala maeng pa'rang'anre' namate (*abadi*). Tau Maya na Aztek ri Meksiko najagai sollanna apinna sangnging a'rinra. Na tau Yunani, Mesir na Roma najagai apinna tulusu rinrana ri pa'sombasombaangna.

[Nialle na nipakasiratang ri Syurkati KJ batu ri bo'bo'a "Aku Ingin Tahu"]

Maka rie' carita ri sikuntuta ri sesena bungasa rie' api ti Tana Konjo? Caritaang sai na nipantama' ri SK **Bulu' Kuuppa**.

Aramaki tala anngisse' kedde' ambaca. A'pilajaramaki pale'! Mulaimaki inni.

| | |
|----|----|
| a | o |
| ba | bo |
| la | lo |
| ha | ho |

balaho



Silariang

Nakua pa'pasangna bohe-bohea angkua: "Rie' sallo' se're hattu natarangang bokona beranga naia matanna." Apa battuangna? Iamintu sirikangmi buru'nea na bahinea ri sesena pa'kalabiniang. Iami injo kajariang beru-beru ri dusung Kanari, desa Possi' Tana, bahine rie' buru'nenna silariang siurang buru'ne rie' bahinenna, siampi balla'na to'ji pole.

Nakua pasiapikang balla'na ri allonna salasa tanggala ruang pulo anrua bulang sampulo anse're 2005, a'lampai iHasnah nigandeng ri Jamaludding (paoje'), sanggenna anre' namminro, tulusu a'lampa ri Jeneponto. Kunjomi mange nasuro pa'nikka kalenna siurang iJamaludding. Lantenapa ri Jeneponto na'talipong mange ri kampongna angkua: "Rie'a ri Jeneponto na kumaengmo a'nikka siurang iJamaludding."

Ri hattunna buru'nenna iHasnah iamintu iJumaring amminro batu ri tamparanga a'boja juku' na niisse'i angkua rie'i ri Jeneponto bahinenna na maengmi a'nikka siurang iJamaludding, a'lampami a'keo' pulisi, na'lampa ri Jeneponto nahoja bahinenna. Nanauppa toje'mo bahinenna ri Jeneponto ri balla'na bijanna ipara'na. Na nialle ruaya tau silariang na nipantama' ri tahanganga laniparessa ante'i pakua a'ra'na pangngatoranga mange ri tau a'pakuaya injo, bahine a'pamaruang buru'ne. Sanggenna kunni-kunni riekiji ri kantor'na pulisina Bulukumba.

Lapaduli Kajang

MTS Guppi Lembanna

Rie' sikola nipaenteng ri desa Lembanna Kajang bungasa'na ri taung 1993, niare' sikola MTS Guppi. Injo nikua MTS battuangna sikola pannyambungang ri tingka' bungasaya. Mingka pok' nipa'pilajaria, iamintu loheangi pa'pilajarang agama naia pa'pilajarang samaraya.

Nunjaria kapala sikola bungasa iamintu niare' Abdul Gani Bolong BA, ammantang ri Kalimporo desa Tambangang Kajang, na jamaang maraengangnaya pole iamintu, paatoro pa'guruang sallang tingka' SD kacamatang Kajang. Ri bungasa'na ammenteng sikolaya galasi se'rena lohena tuju tau, nasaba' anre'pa tau anngisse'i haji'na kodina injo sikolaya.

A'katambaang guru siurang pole ana'-ana' hattunna Idris Betu kapalana. Ri ammarimi ia nijojjo'mi Muhammad Arifin S.Pd ansambei, na niangka'na ri tanggala se're bulang appa', taung 2005. Na taung niangka'na lohena ana' gurunna iamintu

Atta taung rua sabbu

Lohe buangangna pa'keo' ana' mange ri tau nungnganakangai, ibara'na *atta*, *puang*, *tata*, *amma* punna buru'ne, na punna bahine pa'keo'na iamintu *mammi*, *amma*, *ummi*, *anrong*.

Tala sambarang a'kulle a'keo' *atta* mange ri tau toa buru'nena iareka *mammi* mange ri tau toa bahinena. Riolo a'keo' *atta* iareka *mammi* tuhuseng karaengaji, mingka kunni-kunni sambarangmi tau a'keo' *atta* iareka *mammi*. Nulakuukiria inni rolo' pa'keo' *atta* na *mammi*, sallo'pi nampa kupa'tarrusu mange ri pa'keo' maraenga.

Atta batu ri pa'pau *Patta*, battuangna karaeng, na nai-nai ana' a'keo' *atta* mange ri tau toana iamintu ana' karaeng. Ibara'na ri Kajang tuhusengnaji karaeng Kona' ri Kassi na tuhusengna karaeng Zain na karaeng Sommeng ri Jannaya niko' *atta*. Maraengangna berupi niko' *atta*. Biasana tau niko' *attaya*

Pa'borongang pangnguluang sikola

Ri allonna araba', tanggala ruang pulo antallu bulang sampulo anse're 2005 a'pammula tette' sampulo ri SMUN1 Kajang, ri So'larieng na nigaukang a'borong pangnguluang, iamintu a'pabattu pa'jammakang numaenga nagaukang pangnguluang sikolaya taung 2004/2005, mange ri iangase'na ana' gurunna pangnguluang sikolaya (tau toana pasikola SMU Kajang). Na ia nurie'a a'borong, iamintu pangngatoro'na pangnguluang guru-gurunna SMU, tau toana ana' sikolana SMUN1 Kajang.

Ilalangna pa'boronganga injo, lohe sanna' pangnguppa napantama' tau rie'a a'borong napalante mange ri pangngatoro'na pangnguluanga, rie' antarimai pa'jammakangna pangnguluanga, mingka rie' todo' anre' natarima haji'i, na'pantama' pangnguppa pannaba mange ri pangnguluanga. Sanggenna pa'boronganga napa'-samaturuki pa'banyara pangnguluang lompona 25.000 (ruang pulo lima sabbu) rupia, sitau tau toana pasikolaya sihulang, antama' to'mi pa'banyara'na Palang Eja na Paramuka. Punna rua ana'na a'sikola se'reji nirekeng, ka ia a'banyaraya tau toanaji, talia ana' sikolaya.

Na nitongko'mo pa'boronganga tette' se're lallo sikiddi'. Lapaduli KJ 12/05

... MTS Guppi

patang pulo allima tau, bungasa ri galasi se're allante ri galasi tallu, na gurunna nu'ma'nassaya iamintu appa' tau siurang kapalana: Muhammad Arifin, Patola, Saraddin K., Rapih.

Mingka injo Saraddin na Rapih, anre'mo namalling lansulu'mi anjari guru nasaba' narapi'mi sangga amuru'na a'pa'-guru. Sanggenna hattunna kulle kapang labbi mami ri sitaunga. Naia to' isse' Patola, la'lette'i mange ri kacamatang Herlang, na anjari todo' paatoro pa'pilajarang sallang tingka' SD. Battuangna guru nu'ma'nassaya kunjora sallo', kapala sikolana mami punna anre' tambangna, manna mammo lohe guru pannunranginna.

Nunjaria pa'kuta'nang punna se're mami guru, ma'nassana sallo' battuangna anre' na nitambaimi, apa a'kulle katambaang ana' gurunna, punna injoji guru pannunranginna lanipokokang?

Pangngare'na kapalana nakua: "Maengmo a'pantama' pangngera ri kantor agama, iamintu kuerai se're guru anngajara ri SD 351, rambangna Amma Toa Kajang, na anre' to'pa katappukang nadahuanga kapala kantor agama."

Alamsyah KJ

ammakei *andi* ri bokoangna arengna. Injo ammakea *andi* a'nassami angkua tuhuseng karaeng na rie'pa tuhusengna batu ri Bone. Kamua injo ka ri Kajang tala rie' *andi*, mingka *puangji*. Na nakua tau rioloa ratei *puanga* na *andia*.

Anngurai na katuru'-turukang taua ammake *andi* iareka a'keo' *atta*? Punna nampa riolo na nu'keo' *atta* minto' ri tau toanu anre'ja nangngura, mingka punna berupako nunampa a'keo' *atta* iamintu nikua *atta taung rua sabbu* iareka kau ampammanakii tau toanu, ka tau toanu tala niko' *attai* iareka *andi*. Nakua Carda Patawari: "Kedde' rie' sikola a'dahu gallarang *andi* a'ra'a a'sikola nampa nidahu *andi* arengku, mingka anre' sikola a'dahu gallarang *andi*, iami injo na anre' kummake *andi*. Andaa nakke lampammanakii tau toaku. Tau toaku niko' kaleji puang Patawari."

Carda Patawari, Mangkasara

(battu ri lahara 1) Pa'pakahajikang batattana

Singkamua ri desa Possi' Tana Kajang rie' nijama batattana narua passala; maka se'rena rie' nisapala', na maka ruaya rie' nitimba' annorang beru.

Injo sapala'a labbunna salapang bilangangna ansalapang pulo metere naluarana tallu metere limang pulo senti, naia pa'banyara sibilangang limang pulo angkarua juta angkarua bilangangna antuju pulo angkarua sabbu rupia.

Naia nunjamaya iamintu CV Putra Nusantara, na arengna pungkahana niare' Haji Latif Tanggala nunapammulaanga anjama iamintu tanggala appa' bulang sampulo 2005, na nunakatappusanga napanjamaang iamintu tanggala ruang pulo antuju bulang sampulo anrua.

Mandoro panjamana niare' iRonteng ammantang ri Jampang Tambang Kajang, na'pajama tau labbi ruang pulo tau. Angngura na sikidi kamua tau napajama? Nakua iRonteng: "Lohe passala na anre' nikulle angngalle lohe pajama iamintu: Sangnging abosinamo pole, na anre' to' nikulle a'sapala'. Amalingi pole battu tere'a, nasaba' balinna nai' to'mi iamintu sidorongna ballinna salapang bilangangna sabbu, na talia to' nulohe nataba."

Naia gajinna pajamaya ta'sialloa nauppai ta'sampulo antuju sabbu allimang bilangang rupia, mingka gajinna numaraengangnaya bansana pahasa sapala'na na paerang gulung-gulungna tantumi ratena sikidi pa'pagajina.

Naia nunjagaia bate jamaangna iamintu kapala dusungna to'ji niare' iBakri S. Battuangna punna rie' lanagaukang pajamaya na'kulle lammanraki ita' ri assele jamaangna battuangna napirangngai memangji sollanna a'kullei napakahajiki.

Nursalam KJ

????
 Gitte rajja', maengki amparessai annorang beru? Haji' kisa'ring?

Pa'batumintongang

Rie' se're kampong ri Bonto Bahari iamintu ri kalurahangna Tana Lemo nipaenteng se're pa'kare'-karenaang nakua taua lapangang batumintong. Inai a'paenteng lapangang, iamintu niarenga Andi Nuh. Taufik, S.Sos kapala kalurahang Tana Lemo.

Ri sesena tau a'karenaya iamintu tau battu ri kacamatang maraenga, rie' battu ri Bonto Tangnga, rie' battu ri Bulukumba, rie' todo' pole battu ri Mangkasara. Iami inni na naisse' ngase'mo taua angkua rie'mo pa'batumintongang ri Tana Lemo.

Na ri pakarammulana nipaentengmo lapanganga lohe tau a'gompo-gompoi a'pansulu' pau angkua: "Ballo kapang punna a'paentengi se're kalompo'." Rie' todo' pole tau angkua: "Akomo, nasaba' punna a'paentengi se're kalompo', sangnging sibata-batai taua angkua nakke kaminang pore, nakke lohe kujama."

Ri allonna sanneng tanggala ruang pulo anse're bulang sampulo anse're 2005 rie'mo se're tau pa'sambena rajja'a battu ri DPRD Bulukumba mange ri gemana Tana Lemo iareka ri pa'batumintongang nahojai apa-apa nu'kullea nasareangi, doika iareka batu eja sollanna na'kullei tepu lapanganga.

Ri sesena tau a'balu'a bola iamintu Amil siurangang ere, na ballinna bolaya

A'samaturu' a'baju annorang beru

Allonna kammisi tanggala sampulo antuju bulang sampulo anse're 2005 a'se-re-se-rei tau tabbalaya ri kantoro desa Lembang ambicarai ri sesena annorang nulanijahua. Nai-nai rie' ancidongi pa'se'reanga injo alloa ri kantoro desa Lembang iangase'na tau toata siurang tau maccata, pa'se'reanga injo alloa kapala desa Lembang ampungkahai, rie' to'i pole tau battu kantorona cama' iamintu Andi Muhammad Yusuf.

Akhmad kapala desa Lembang ilalang bicaranna hattunna napungkahai pa'se're-angi naerai mange ri tau tabbalaya: "A'samaturu' a'pikirikiki ante' pakuka na'kulle injo annorang lanijahua a'dakka haji' siurang hebbere maeng? Antere'i mae tujunna annorang nulanijahua sallo'?" Tallu pilena: maka se'rena sambungna annorang battua ri Kalumpang lantama' ri Anju'-anjuru, injo mami nisambungi numaengamo nihaju sipolong ri hattunna Babul Khaery kapala desa Lembang; maka ruana ri Karangkang Bantia dallekang balla'na Muslimin daeng Mappacing a'tarusu anta'le ri Monroa dusung Pandang Tahaya desa Lembang Lohe; maka talluna ri Tana Kuntung Kadieng Lompoo annorang mangea ri ampi'na pa'jerakang Batumentang. A'tarrusu naung ri Paku-paku sallo'.

Inakke tau nianakang ri Lembang sanna' sukkuru'ku allangngere karebanna angkua rie' annorang beru lanijahua ri desa Lembang, nasaba' injo tallua annorang nulanijahua sanna' lohena saba'na nabiasa niannori. Iami injo inakke manna mamotala ammantanga ri Lembang, amminahanga angngurangi pa'doangang mange ri tau rie' a'ra'na bara' a'kulle na'dakka pa'bajuang annorang berua siurang haji' na hebbere maeng. Iami injo na kuerai mange ri bija-bijangku a'samaturu' a'lemo sibatu, a'bulu sipappa', allabbui rurung allabbaki cidong. Abdul Haris, Goa a e l mo SbŠ, a †l o Spp, a l †A >> q a l bK Cdoq

sibatu iamintu lima sabbu rupia, na ere sisabbu lima sibotolo, na ri sesena tau ammallia bola iamintu tau tunibetaya a'banyara bola iami inni nalohe tau a'toje'-toje' a'karena nasaba' andai nibeta, na punna nibetai a'banyarai bola.

Na ri hattunnamo nipakarammulai iareka tette' tujumo, rie' ngase'mi tula'-karenaya battu na lohe tau tala maengpi a'sambajang isa namae ri lapanganga. Rie' todo' pole tau tette' salapangmi nampa battu.

Na punna maengmo a'karena massing-massing mangemi a'banyara bola; naia tunapa'banyaraya iamintu tu'balu'a bola. Lohe todo' pole tau nakua: "Cata' mama," rie' todo' pole tau tala nau'rangimo inrangna annabaya.

Ri sesena tau posoa a'karena biasai a'cidong-cidong riolo nasaba' punna adde'i a'cidong-cidong biasa tau alippui. Lohe tau tala naisse'i angkua punna maengmaki a'karena adde'ki kullei mange a'cidong.

Rie' se're hattu la'karena mingka anre' bolana na injo taua nuadde'niisse' angkua tau battua antere', mingka naitte'i ngase'i tau sanggenna allari mange-mange singkamua tau lippu na sangnging anumakkala tau pongoro.

Amiluddin ri Tana Lemo

A'samaturu'ki ampiara boronga

Injo boronga punna nipikiri sanna' lohena matu-matunna mange ri sikuntu rupa taua, iami injo nampa riolo na nipiari boronga ri Amma Toa. Anre' napabbiangi boronga nitabbang nurie'a ilalang butta Kajang punna anre' naparallu kalea. Mingka punna parallu kalea lanipake kajua, ebara'na la'ajuki balla', a'kulleji mange nipauang angkua: "Parallua, Bohe, kaju ka la'baju balla' ampungta," nasareangjaki. Mingka rie' na'pasangang: "Punna toje' a'ra'ko a'baju balla' annabbangmako sillohena lanupakea, mingka punna annabbangko ruang poko' a'lamungko tallu poko'; punna annabbang tallung poko', a'lamungko limang poko'." Apa saba'na Bohe Amma na nasuroki a'lamung amminro punna maengki annabbang? Nasaba' ianna labbusi boronga, sollanna punna anre' nisambe lambusu sallo', nampa loheji tau lammake ribokoangna.

Apa injo napaua Bohe Amma mange ri tulannabanga kaju nuannaba toje', siupai pangngadakanga nurie'a nahaju pammarentata ri sesena boronga ri Indonesia, nasaba' lohe padanggang kaju, mingka biasa to'i pole anjari palukka' kaju, natambahi nuanahallia siurang nunalukka'a. Kunni-kunnina sanna' lohe tau anjama ri pammarenta nihuntulu a'lukka' kaju siurang padanggang kajua. Apa batena na'kulle nijagai palukka' kajua, ianna labbusi boronga? Anre' maraeng batena anjagai boronga pantarangangna a'samaturu'pi tau tabbalaya. Ruang taung allalloa ri Bulukumba natekengi kapala daerah Bulukumba Patabai Pabokori se're pangngadakang ri sesena boronga.

Injo pangngadakanga ri Kajang ri sesena boronga sanna'mo mallingna nigaukang napasamaturuki tau tabbalaya. Mingka punna nipikiri injo tau Kajanga angngurai na riolo niisse' angkua injo boronga sanna' lohe matu-matunna mange ri katallasangna rupa taua? Kupauangki amminro ri sesena matu-matunna boronga niyara:

Ammalliki kedde' sura' kareba Bulu' Kuuppa

Gitte tau Konjoa paralluki sukkuru mange ri Puang Alla-tala ka rie' mingkaja pa'russanakangta a'paenteng sura' kareba bicara Konjo. Punna nihojai kampong maraenga langkara rie' sura' kareba ammake bicara daerah. Na sinungka'na rie' sura' kareba bicara Konjo lohe kareba niisse' battu ri kampongta na kampong maraenga na lohe todo' pa'pilajarang niuppa, ibara'na ante' pakua a'lamung-lamung nuballoa.

Iami injo na paralluki antungkului, bara' kamuai apa na labbujai inni sura' karebaya, ka lohe sikali matu-matunna. Ibara'na, punna rie' kareba kiuppa kiukiri nampa nipantama' ri sura' karebaya. Nakua tu'paengta: "Punna lohe kareba antama' a'kullei minggu-minggu ansulu'," mingka kamunnina nampai sikali sihulang, biasa to'i sikali na ruang bulang. Nampa punna ansulu'bara' a'kulleki ammalli nampa kibaca-baca, ka anre'ja nasuli' ballinna 2000ji rupia.

Pannembokang batattana ri Bonto Bahari

Taliemo sikidi batattana nipakahajiki, battuangna punna anre' na'kulle nisapala' nassami angkua nitembo'i. Pa'pada ri dusung Tempantu desa Lemabanna Bonto Bahari, rie' batattana nataba pannembokang lantarang sanna'itabbangna na nampa pole acipu-cipui.

Labbunna nijama iamintu karua bilangangna antallung pulo metere, na labba'na rua metere, kapala'na ruang pulo senti, lohena doi'na ruang bilangang allimang pulo juta rupia.

Poko' nunjamaya iamintu tau kuntu to'ji ri desaya niare' LKMD (*Lembaga Kesejahteraan Masyarakat Desa*) Kalompo'na Kasagenaang Rajja' Desa), battuangna pa'se'reang kapareangna tau ri desaya, na nipungkahai ri Abbas Mustari, na mandoro iareka napungka

-anahajiki pamminroangna pa'linoang -anjari pammantangang ri sikuntu lohena olo'-olo
 -anjari kabattuang anging
 -anjari pa'bissa anging ru'musu
 -anjari kabattuang ri sikuntu lohena buangangna ile
 -anjari pa'riring battu ri anging lompoo
 -anjari parehangang balla', lopi, siurang maraengangnaya.

Inni kupau to'i pole matu-matunna borong bangkoa. Nasaba' injo borong bangkoa kunni-kunnina ri Indonesia lalabbusumi nitabbang nihaju pangngempang lanijahua pa'piaraang juku' siurang doang. Pa'pada todo' ri Bulukumba lalabbusumi borong bangkoa nihaju pangngempang. Kunni-kunni luara'na borong bangkoa ri Bulukumba rie'mi lohe sikidina 500 hetto, mingka tuju taha sampulona sanna' panra', rie' mami tallu taha sampulona haji'.

Gara-gara lohena labbusi borong bangko ri Bulukumba ruang taung alloa, na nagaukangi pammarentata ri Bulukumba a'lamung bangko ri desadesa nu'biring tamparanga naia luara'na kabusi lohe sikidi 250 hetto, ta'bage-bege mange ri sikuntu lohena desa nu'biring tamparanga. Ri Kajang punna tala kusalaya luara'na patang pulo hetto, ta'bage mange ri ruaya desa iamintu desa Lolisang ruang pulo hetto, kelurahang Laikang ruang pulo hetto. Punna kuitte batena lompoo bangko nilamunga nasaba' lohe napasabaki:

-injo nunilamungia bangko anre' nahaji' nasaba' sarringi bombanga siurang aterasai tanaya

-anre' niyara haji'i

-a'tappu'-tappu' doi' pa'piarana;

-anre' nabiasa naung pammarentata nurie' pasisambuang jama-jamaang ri sesena pa'lamugang bangkoa.

Abdul Haris daeng Matasa, Goa

Mingka punna anre' na kisama-tungku, tala kullei lalabbu ka anre' tau lammalli. Kuerai ri parangku tau Konjo, araki sangnging a'ra' lanidahu mingka kihallii, ka maengmaki nidahu pintallung. Ka injo doi' pammallita lanipakei pole a'pansulu' sura' kareba.

Inni sura' karebaya bara' a'kullei nipalabbang mange ri tau Konjo nummantanga ri pa'rasangengta iareka ri pa'rasangeng maraenga. Se'rena nakua Carda battu ri Pa'se'reang tau Bulukumbaya ri Mangkasara (*KKB Pusat Makassar*): "Bara' a'kullei tau Konjo nummantanga ri Mangkasara na ri ampi-ampi'na na tangkena KKB ri pa'rasangeng maraenga, ibara'na Bontang, Kolaka, Luwu Utara, ammalli sura' kareba bicara Konjo. Ka lohe kare'-kareba lakiisse' ri kamponga, manna mammo lereki ammantang."

Carda Patawari, Mangkasara

pajamaya niare' Syamsir.

Lohena tau napajama sampulo angkarua tau, na nasare pangngasselang tau pajama biasaya ruang pulo allima sabbu, mingka tukangna pangngasselangna tallung pulo allima siallo.

Hattu bungasa napanjamai tanggala rua bulang sampulo anrua 2005, na nakatappusang tanggala tuju bulang se're 2006.

Pangngare'na se're tau ammantang kunjo nakua: "Anre'ja nisa'ring na kirugi a'banyara paja' nasaba' napakahajikang to'jaki annorangta pammarentata, na liba'mi sukkuru'ku nasaba' a'kullemi taua a'motoro a'tarrusu naung ri cappa'na, battuangna anre'mo na kissera a'dakka, labbipa pole punna rie' nierang."

Nursalam KJ

Pungkahana pulisia ri Kajang nisambe

Iangase'na ana'-ana' a'samaturukang a'baju pa'roa'-roakang tanrana la'lette' pungkahana Perdi Irawan ri bangnginna sattua tanggala ruang pulo and tallu bulang sampulo anrua 2005 ri Kajang ri dallekangna kantoro'na ri kampong Jannaya desa Lembanna.

A'kelong *elektomi* nipalampai AIPTU Perdi Irawan mange ri jamaang beruna ri Soppeng. Sanna' ballona nasaba' nai'i jama-jamaangna anjari Kasat Sekrin ri Polres Soppeng. Naia sambenna niare'a AKP Musakkar battu ri Polres Bulukumba nai' anjari pungkaha pulisia ri Kajang. Na rie' upa'na haji'mi batena a'padakka jamaang pada todo' Irawan, a'pakasannang kampong na mallingna ruang taung labbi.

Ri injo bangngi pa'roa'-roakang rie' to'i cama' Kajang siurang Koramil Kajang pungkahana tantaraya ri Kajang, rie' to'i Jassa Kajang. A'rurung ngase' ajangna a'samaturu' amparurui Irawan. Nai'mi a'bicara pa' cama' Wahid Jalil angkua: "Tarima kasi silompoang mange ri AIPTU Perdi Irawan ri sikuntu kahajikangna ri hattunna anjama terasa ampakahaji'i kampong ri Kajang sanggenna a'patanre' palukka', anre' karucca-kang, sannangi kamponga, sannang to'i rajja'a anjama-jama ri kokonna, sannang pagalunga siurang pajakkala juku'a ri tamparanga. Rie' upa'na jama-jamaangna AKP Musakkar pa'pada pungkaha pulisia ri Kajang a'kulle napa'pada batena anjama Irawan na bara' a'kulle rateangna pole."

Injo bangngia nai' to'i a'bicara puang H. Abd. Halim pa'pada taunna rajja'a ri Kajang angkua: "Maemaki ri sikuntuna turie'a inni bangngia ampanggeraangi AIPTU Perdi Irawan mange ri turie' a'ra'na bara' a'kullei salama' ri jamaang beruna ri Soppeng. Narie' upa'na na'haji' pole batena najari pungkaha a'pakahaji' kampong haji' batena a'samaturu' ri paranna pungkaha."

Ri allonna sattua tette' 14.00 ri lohoroa a'lampami Irawan mange ri Soppeng, lohe tau angngurangi, sambilang batunna oto, tuju oto diki, rua oto lompoa anggerangi apa-panna. Naia tau nasalaia a'ritisi ngase' ere matanna, rie' todo' angngarrang a'pirau lantaran kahajikangna batena a'padakka atorang talia atorang tunggala.

Abd. Halim, Jannaya

Kaju nijakkala

Ri Solorang dusung Kassi' Pute desa Lolisang Kajang, ri allonna juma', tanggala salapang bulang sampulo anrua 2005, nanijakkala kajunna iCambolong, bahinenna niare'i Tintang, ammantang ri desa Bonto Baji' Kajang.



Bungasa'na na niisse'i angkua injo kajunna iCambolong, anre' sura'-sura'na battu ri kantoro boronga ri Sulawesi Tenggara, iamintu nijakkala otona ri Karim Ruha, ammantang ri Sengka Tallu nallurang kaju pareha.

Injo kajua na'punnaimi ipuang Haramang, amuru'na kulle kapang annang pulo taung, ammantang ri Jannaya desa Lembanna Kajang. Mingka pangngare'na puang Haramang nakua: "Inakke nuku-halliji inni kajua ri pabalul' niare' iTintang, lohena iamintu appa' kubi'."

Sanggenna nijakkala to'i pole iTintang, bahinenna iCambolong, na niparessa to'i ri kantoro'na pulisia. Rie'na ngase'mi injo tau sikunjo na nikeo' to'i taunna siurang pulisia boronga, na'lampa nahojai injo urangna kaju nuniluranga, iamintu nurie'a ri Solorang desa Lolisang Kajang.

Na pulisia Kajang nipungkahai ri Danse' Kajang Ferdi Irawan Saragih, na rahangangna niare' Brigadiri Muhammad Yusuf, Brigadiri Medang, na se're pole

Nijakkala ri pulisi tau annabbang kaju ri tanana to'ji

Kajariang ri dusung Tana Eja desa Seppang Ujung Loe tanggala ruang pulo angngannang bulang sampulo anrua 2005, bahine niareng Dani' Mappi nialle ri pulisia Ujung Loe nasaba' annabbangi kaju kunjo ri tanana. Na niallei ri pulisia Dani' Mappi nasaba' rie' tau anjamma' angkua: "Rie' antabbangi kajungku." Tau anjamma'a niareng Tanga' ammantang ri Sumpang Ale' dusung Tana Eja.

Pa'kedona pulisia anjakkalai iDani' Mappi anre' salana nasaba' napsituru'i bicaranna tau anjamma'. Kareba allabbang battu ri tau kunjoa ammantang ri kamponga angkua: "Lasaurui pulisia lanjakkala tau nijammakang. Nasaba' inai anjamma' najakkalai tunijammakanga. Apa-apamo natabbang ilalang ri kokonna taua nakke macca to'ja anjamma' ri pulisia angkua natabbangi kajungku ianu nutimbo ri kokonna ianu. Lapassang mamaki sikanre juku' sollanna rie' pangngatorang, manna mamam talia atorang. A'ra'na kedde' tunipanjamakia mange rolo' nahoja pa'kajariangana na nakuta'hangi inai koko, inai lamungii kokonna taua."

Lohe maka pa'kuta'hang ri tau kunjoa. Iami inni na kungkua lasaurui pulisia lanjakkala tau nijammakang. Kareba battu ri tau maraenganga angkua: "Palakara anjamma'na iTanga' nasaba' kapala dusung angngurangi anjamma' ri pulisia."

Kupihali bicaranna taua: "Gau' tala sitinaja ri sesena pa' dusung, saba' pa' dusung a'tantu naisse'na angkua Dani' Mappi pata tana sangnging ia ambanyarai sima tanaya kunjo. Mingka punna kamua'i pale' aramaki pakei kapala dusungta, nasaba' a'pa'besehang tau, ammanraki areng pammarenta siurangang la'pashunumi tau lohe. Araki katappu-tappu ri sesena kajariangna inni."

Angnguppaa pa'se'reang palakara battu ri bijanna Dani' Mappi angkua Dani' Mappi lanjamma'i ri pulisia angkua: "Narampasai apa-apangku iTanga', nabocea iTanga', nasaba' a'lamungi kaju ri tanangu anre' napau-napau ri nakke. Napakakodimi arengku ri tau lohea siurangang nasuro sessa ri pulisia."

Pangnguppaku nakke, se're annorang kaminang ballo ri sesena, naia sangka' pau tangnga a'nassa ri katojengang. Iami injo na lingkaii nulammanrakia, jako soroki simata jarung punna napangngareki napa'rugiki paranta tau ri sesena katojenganga.

Andi Mattaiseng, Herlang

Brigadiri Mattang. Na lohe pole maraengangnaya, rie' todo' battu ri kantoro kaboronganga, lalangmi pulisia todo', na rie' pole tantara niare' Muhammad Tahir.

Apa nakua iTintang ri hattunna nikuta'hang? Nakuana pulisia: "Angngurai na anre' nungngalle sura' pangngera kasalamakang kajunna?"

Nakua Tintang: "Punna rahangangnaji ruang puloa kubi' anre' mintodo' na nisareki sura' pangngera."

Nakua pole pulisia: "Angngura nubarani allurang kaju battu ri Tenggara mae kunni ri Sulawesi Selatan?"

Nakua to' iTintang: "Sitoje'na anre' minto'pa kedde' kullurang kaju, mingka nakua ipuang Haramang: 'Lurangmi kajunna, nakkepa tanggong punna battu anta'le ri kamponga,' mingka nakua: 'Assalang rie' todo' dahuku.'" Iaji na nisare to'i bedede' appa' kubi' na nalurangmo sitangnga. Rie' kapang labbi rua kubi' nalurang, na nijakkalai otona ri Karim Ruha.

Mingka nakua ipuang Haramang: "Anre' pasi-bicarangku a'pakunjo, inakke inni ammalliku minto'ja kaju, mingka anre' to' kuisse'i angkua nuanre' sura'-sura'na."

Na ilalang passala tuju pulo angkarua nakua: "Tau a'balu', tau ammalli na tau allurang (battuangna padaji nataba ngase' kasalaang siurangang hukkung)."

Naia lohena kaju nijakkala anre'pa na'nassa kubi'na, mingka pappana iamintu sibilangang patang pulo antallu pappana, na a'massang kaju balatung pareha labbu.

Punna ninaha-nahai kedde' jama-jamaangna inni, battuangna loheangi karugiangna naia sahala'na. Nasaba' kedde' angngallei sura'-sura' simang anre' ta'laloja kedde' nalohe karugiangna. Maka se'rena anre'mo na'dakka jama-jamaang maraengangnaya, na maka ruana anre' to'mo na nauppai kajunna, labbipa pole la'banyarai mange ri pulisia. Nursalam KJ

PA' PANGNGAJARA
Tutala tunru' ri atoranga,
ia nitaba hukkung
na lohe pole karugiangna.

Bupati a'paressai batattana beru

Ri allonna sattua tanggala ruang pulo angngappa' rie'i bupati Bulukumba A Sukri AS siurang pa'sambena Padasi ri balla'na cama' Kajang ri tette' rua ri lohoroa. Naia kariekangna bupati na pa'sambena la'paressai batattana nunajamaya kapala desaya ri Kajang, ante'mi sanggenna batena anjama kapala desaya. Ka sampuloi anrua desa se're kalurahang angnguppa doi' pannunrangi battu ri pungkaha lompoa ri Jakarta. Lohena doi' pannunrangi ta'se're desa lohena ruang bilangang limang pulo juta rupia, na lanjama batattana rua kilometere labbuna nisare batu diki-diki silau' kassi'.

Na situru' nijanjiangi kapala desaya parallui maeng jamaangna inni bulang, iamintu bulang sampulo anrua 2005 ka lalabbusumi pa'taunganga 2005 laantama'mi taung beru 2006. Punna anre' namaeng tuju pulo allima tahana sibilangang kapala desana antanggongii apa saba'na na anre' namaeng. Na maengmi natarima doi' na'bage ruanna sibilangang juta rupia lohena. Na injo alloa kasaheangna bupati ammaressa a'rungang ri kalurahang Laikangji, ka bangngimi.

Abd. Halim, Jannaya

Kacilakaang oto na motoro

Ri kalurahang Jawi-jawi Tanete ri allonna sanneng tanggala ruang pulo angngannang bulang sampulo anrua 2005 nallappo oto tere' Andi Sainal Azikin.

Mula-mulanna injo alloa a'lampa a'kantoro ri sikola SMP3 Tana Toa Kajang. Tette' sampulo anse're samaturu'mi iangase'na pagabena siurang iangase'na guru-gurunna na nipungkahai ri kapala sikolanna Syarifuddin SPd, a'lampa ri pa'kahajuangna se're tau angngajara todo' kunjo ri SMP3 Kajang niare' Sabran.

Allantena ri pa'kahajuanga massing angnganremi, mingka ri hattunna angnganre tappa' a'dappo'i se'ru'na. Maengi angnganre langnginungi na ta'kembo' isse' ere inung. Alleang la'lampai nadongkokimi motoro'na (Sogun 110), lanapalolo'na motoro'na tappa' ta'jiri'i pole, sanggenna nipangkuai ri urang-urangna angkua: "Atutu laloki, nasaba' intu kuite batena mamam lohe pa'buritta mange ri batang kalenta," alleang a'lampa.

Na tette' sampulo anrua ri alloa nakajariang kacilakaanga, pangngare' sabbi pangngitte nakua: "Injo motoro'na oto tere'a a'rurung-rurung ngase'i battu ri pangngolo timoro (pambuakang alloa) iamintu ri annorang Tanete Kajang, mingka narapi'na pa'bissaang otoa ri Jawi-jawi tappa' napalekko to'mi otona antama' na anre' na'sare pa'mata-mata. Battu ri bokomi motoro'na tappa' nalappo to'mi sa'ringna, kajariangna irahami taua ri sepa'a buntulu."

Maengi injo nierangmi ita' mange ri balla' garringa ri Tanete, mingka nasaba' ajjalamo battuangna anre' minto'mo nakulle najama doktoro, alleang nakatappusi nyaha ri tette' rua ri alloa, na nierangmi amminro ri balla'na ri Annorang Durian Tanete, Bulukumba.

Nupoko' nasalaia iamintu bahinenna Andi Sriyanti na ana'na se're buru'ne amuru'na karua hulang.

Tette' sampulo ri bangngina na nikahangangi ri pangngahangang sallanga, na tallung bangngi nigaukang sitampe-tampe pa'rannu-rannu mange ri tau nahokoia (Ta'ziah), na tallung bangngi to'i sitampe-tampe rie' urang-urangna mange ri balla'na na nipungkahai ri kapala sikolanna Syaripuddin. Nursalam KJ

Anre'pa nisambe kapala dusung

Dusung Kassi' Lohe desa Lembang siurang dusung Marajo desa Bonto Rannu Kajang kunni-kunnina anre' kapala dusungna. Kapala dusungna Kassi' Lohe iamintu Zakariah rie'i narapiki ajjala kamateang ri hattunna bulang Rumalla allalloa, naia kapala dusungna Marajo Muh Jufri maengmi napansulu' kalenna kapala dusung gara-gara lohe jama-jamaang maraengangna.

Kunni-kunnina rua dusung siampi'-ampi' anre' kapala dusungna, nasaba' anre'pa pa'sambena. Kulle kapang ri ruaya dusung anre'mo maka anjari kapala dusung iareka natungkaili kapala desana anre' nasambe hebbere ianna lohe a'bage punna nurie' lanibage, iareka apaji.

Injo kapala dusungna pammarenta kaminang rahangang mingka iagnase'na jama-jamaang nurie'a lanagaukang tau tabbalaya anre' na'kulle punna anre'pa namaeng natekeng kapala dusungna, padayami punna rie'i lapasilalangang olo'-olo', koko, galung. Iangase'na kamua injo anre' na'kulle natekeng desaya, cama', siurang pammarenta maraengangnaya punna anre'pa namaeng natekeng kapala dusungna. Injo se're dusung punna anre' kapala dusungna a'kullei anjari pa'sabakeng pasisasalaang mange ri tau tabbalaya iareka a'paannyangi jama-jamaang parallui. Haris dg Matasa, Gowa

Assala mulana panjamaang lopia ri Munte Lemo-lemo

Kaporeangna tau Bonto Baharia anjama lopi sanna'mi naisse' ngase'na sibatua lino. Mulai lalang kampong Bulukumba iareka lalang nagarata Indonesia iareka pantarang Indonesia pa'pada nagara Amerika, Eropa, Australia, Jepang, Cina, Afrika, Jerman na loheiji pole kampong maraengangna. Lohe kampong maeng nasombali lopi pinisi bate hajuna panrita lopia ri Tana Lemo Bonto Bahari. Iamintu nikuaya "Phinisi Nusantara" ri taung 1986 annyombalang baturu ri Tana Beru mange ri Vancouver Kanada lamminahang ri se'rea panggaukang bakka' niarenga *pameran kebudayaan internasional*. Pinisi niarenga Hati Marege annyombalang baturu ri Tana Lemo mange ri Australia, na loheiji pole maraengangna. Pa'pada pannyombalangna lopi niarengang Ammanna Gappa mange ri Madagaskar Afrika Selatan, naloheiji pole kasabbiang pannyombalang tuliling lino. Iangase'na panrita baturu ri Tana Lemo anghajui na nasombalang a'rurung panritana Bira.

Tala se'reji pangngakuaangna tubattua pantarang kampong mange ri taunna Bonto Bahari. Loheiji kaporeang naballaki panritana Bonto Bahari maraengangna a'baju lopi. Iamintu kaporeangna annyombalang lopi iareka anjari *nakoda* ri se'rea lopi pinisi. Ampariolo na mariolo panrita annyombalang lopia, sanna' porenna iamintu naballaki tupanritana Bira. Punna tau Lemo-lemoa ri Munte iareka tau Tana Beru iareka tau Ara niaku kaporeangna anjama lopi, mingka tau Biraya niaku to'i kaporeangna annyombalang lopi. Manna antere' mae, manna bombang rusia' ri dallekang, manna lalang kala-kala, punna maengmi napa'tepu kalenna, napake pakena, nabaca bacana, iareka napataba sara'na, na nabeso' balangonna, na naka'rang sombala'na, na natannangmo gulungna, nasombalang to'jia lopinna. Nasaba' maeng pasangmi todo' sikalia baturu ri bohebohena riolo: "Kualleangi tallanga na toalia. Nasaba' tala tallangi mata alloa ri tangnga allona alloa."

Hattunna riolo, desa Bira panritai ri pannyombalang, mingka anre' napanrita ri panjamaang lopi, desa Ara panrita ri panjamaang lopi, mingka anre' napanrita ri pannyombalang lopi, mingkaka kalabbiangna panritana Ara nasaba' a'lampa ansulukangi pantarang Bonto Bahari anjama lopi, mingkaka panritana Munte Tana Lemo kurangi tuansulukang kampong anjama lopi. Mingka tau Munte Lemo-lemo ri kalurahang Tana Lemo iareka Tana Beru panrita ri panjamaang lopi siurang panrita ri pannyombalang lopi.

Saba'na narie' kampong niare' Lembang Karaeng

Injo kamponga na niare' Lembang Karaeng saba'na rie' kaloro diki-diki. Mingka rie' tau labbiri, kunjo ri kaloro diki-dikia a'limbang. Nanjarimo niare' Limbangang Karaeng. Mingka sanna'mi mallingna sanggenna nibodoi angkua Lembang Karaeng, sanggenna kamunnina.

Sirattangi kapang punna kucaritai kaballoangna arengna nasaba' nu'bajua carita kunjoi nianakang. Punna a'limbangmo karaenga nasuro renrengmi jarangna ri joa'na, nasaba' deppo' galunga ri Kabibing lanaannoro mange ri bolana karaenga, iamintu karaeng niare' iYaga daeng Ballo', Karaeng Moncong Buloa. Na niare' Karaeng Moncong Bulo, nasaba' ri ampi'na bolana natimboi lamung-lamung, iamintu parring, bulo, timallang na pattong. Naia injo ngase' raungna moncong.

Kampong niare' Lembang Karaeng, rie'i ri dusung Tete' Aka' desa Tambangang Kajang. Mingka punna

Carita turiolo boheta

Hattunna riolo ri hattunna anrabba inru'a, banna'a, kaluku lohea, tuju bulang allo timoro taung 1972. Ia nakke injo hattua caddi-caddija, nampa a'sikola ri galasi tallu. Injo hattua pa'risi anre'pa nasangka' buangangna bonena lino. Punna nipikiri katallasang riolo lere sisalana punna nihoja kunni-kunnina, nasaba' riolo kurangiji sikola iangase'-ngase'na nuniittea mata.

Na niisse'mi nikua sajarana kaballoangna kamponga. Punna tangnga nihoja kasalamakanga igitte rupa taua panra'ki ri linoa, labbi-labbipa ri allo riboko, nasaba' pa'pasangna tau rioloa rie' hattunna lambua' ngase' sikonjo paunna turioloa.

Kiassai ngase'mi kunni-kunnina. Naparallumaki tapakkoro mange ri Turie' a'ra'na. Araki barani gau'

Mingkaka loheiji tuanre' angngisse'i assala mula kajariangna nikuaya panjamaang lopi ri Tana Beru iareka ri Tana Lemo. Loheiji tusisala pangnguppa mange ri assala mulana panjamaang lopia ri Bonto Bahari. Lohe tusala pahang, biasa to'mi naukiri ri bo'-bo', napalele mange-mange angkuaya ruaji desa panrita lopi ri Bonto Bahari iamintu desa Ara siurang desa Bira, nakulappai narampe Munte Lemo-lemo ri desa Tana Lemo. Biasa to'i pole naukiri ri sura' karebaya riolo ri hattunna Suharto pau nipauang ri tau tala a'pahang palakara panjamaang lopi.

Pa'pada ukirangna siana'ta Ir. Nasrun M. Patadjai, baturu ri Gorontalo siurang Amrullah Pase na Asmar Parsan baturu ri PT. IKI, lalang ri bo'-bo', "Menapak hari esok Bulukumba yang lebih baik," editor Anis K. Andhika siurang A. Mulyadi. Injoka antama' kasalaang, punna nibicara panrita lopi na nikaluppai tuMuntea/ Lemo-lemoa ri Tana Lemo iareka ri Tana Beru. Antama' todo'i siana'ta Abdul Kahar Muslim nasaba' maeng to'i napau ri hattunna kampanye pammileang bupati ri pa'golokang Tokambang Tana Lemo siurang ri hattunna ri Bira angkuaya Araji desa panrita lopi na Biraji desa panrita pannyombalang lopi ri Bonto Bahari, anre' napantama'i desa Tana Lemo iareka Tana Beru salamang desa panrita lopi, iami inni desa assala mulana lopi nisisi'a ri Bonto Bahari. Iami injo napa'sabaki naparallu nipallambusu sajarana lopia ri Bonto Bahari.

Situru' pau-paunna tupanritaya angkuaya kabattuangangna nikuaya *lopi nisusung* (ebarana, pinisi, pajala, patorani) iamintu nimulai baturu ri tallangna kappala'na Sawerigading riolo. Sajarana Sawerigading riolo annyombalang baturu ri kampong Luhu' mange ri Silajara mingkaka niruppai ri bombang bara' nierang nianyukang ri pa'colo' balobo na nitanra' ri anging kancang sanggenna tallang mate ngase'i lurangna, niahangang ngase' ri Bira ri Panrang Luhu'. Kale lopinna Sawerigading ta'pue tallu. Kalabiseangna siurang sottingna rampe naerang bombang mange ri Lemo-lemo Munte, pa'gulingangna napa'pilajareng siurang sombala'na manyu' mange ri Bira, na sitangngapa pole rangkana naerang pa'colo' mange ri Ara. Iami injo naniarengmo tuBiraya panrita pannyombalang lopi, tuAraya panrita pajama lopi, na tuLemo-lemoa ri Munte niarengi panrita assala mulana lopi nisusung. TuMuntea iareka tuTana Lemo panritai ri panjamaang lopi na panritai ri

pannyombalang lopi. Gara-gara injo na rua kapanritaang naballaki tuTana Lemo siurang tuTana Beru.

Ri Munte assala mulana lopia

Situru' sajarana tupanritaya, angkuaya puntana napa'rampei kalabiseang lopinna Sawerigading ri Munte Lemo-lemo, iamintu niarenga Karang Puang. Battuangna pauna iamintu se're pammantangangna sikonjo tupanrita iareka uhalli ri agamaya iareka sikonjo tumalabbiria ri Munte langgaukang pasiitte-siitteang para tupanrita. Biasa napake a'pikiri a'naha-naha sannang. Biasa to'i nipake langngajari pangngissengang agama mange ri tuma'kampongang ri Munte. Mulai pangngissengang satinjana batang kalea, pa'sambajangang, erang matea sanggenna palakara pammula panjariangna nabbi Adang.

Ri hattunnamo rampe kalabiseang lopinna Sawerigading ri Karang Puang, baturu ngase'mi tuma'kampongang amborongi nahoja-hoja nasaba' nampanna angngitte. Rie' to'mi turungkale panrita iareka uhalli agamaya siurang tumalabbiria, nanasuro panai'mo ri biring kassi' iareka ri bontona baturu ri pannappasang bombanga. Iaji napau tupanrita agamaya angkuaya: "Inni kajariang a'pakonna nasaba' kakoasaangna Alla-taala mange ri gitte ngase'. Rie se're nula'baturu iareka lakajariang ballo ri Munte, punna kalabiseanga inni niisse'i nipikiri nipa'matu-matu nipanari lopi." Iami injo na'samaturu'mo panritana Munte a'pala'-doaang pa'pigojjo' lambusu, iareka pa'pakedo baturu ri Alla taala. Sanggenna nipituruangmo ri so'na batena a'baju lopi nisusung na napa'situru' kajariangna batang kalenna rupa taua. Sanggenna naallemi napa'tujung panjariangna lopi maenga naitte ri so'na. Na'lampamo ri boronga angngalle kaju nulanahaju kalabiseang siurang kaparalluang maraengangna. Napilei na natabbang pangkulu kaju dalle' mangeda ri pambuangang ri mata alloa.

Ri hattunnamo maeng napatonrang kalabiseangna tupanritaya ri Munte Lemo-lemo sanggenna nakeo'mi panritana Ara lambalii anjama rangka lopi nasaba' antama' to'i panrita ri panjamaang lopi, na ri hattunnamo lamaeng (jarre' sottingmo) lopia na narapi'mo sisikangna, sanggenna nikeo' to'mi panritana Bira lanabali annisi' sanggenna naerang nasombalang.

Safaruddin, S.Pd, Tana Beru, Bonto Bahari
[lanipatarrusu caritana bulang ri boko]

Pa'nganrona bohe

Ta'sikali sitaung gitte kunni ri bataya anggaukangi injo nikua pa'nganro. Patang pulo allo sangnging a'se're taua iangase'na ada'a ampa'-sangka' ngase'i injo nulata'pakea ri pa'nganroa.

Injo nuappa' passala riolo—tabbang kaju, tatta' uhe, rao doang, tunu bani—a'kulleji nipake mingka iapa injo punna nigaukangi pa'nganrona bohe sibatua lino. Nasaba' rurungangna mintodo' iangase'na nuanre'a naitte mata nalangngere toli lalie' ngase'mi inni kunni. Pa'bungasai nipambuangang saggenna mange ri kasa'rang amaei pa'piitteangi tanja'na ri tau numbolaia pa'pasang iareka nundallekanga sai' bulua.

Ri bungasa'na a'nganro taua nagere' tedong. Anu injo ri hattunna lanigere' tedonga mangemi bohe nu'linrunga ansapu-sapui bokona tedong nulani-gere'a natappa' ammene napatara kallongna. Na gitte kunni tania kaa'rang niare' injo na nigaukangi pa'nganro nasaba' gitte ngase'mi monena nikellaeng adinging-dinging ngase' ka pa'pasang angkua.

Ri taung 1994 tanggala lima bulang tuju allalloa ri hattunna nagaukang pa'nganro na bohe nu'linrunga. Nammumba tedong le'leng puppu'a pa'rasangeng iraja narie' todo' buleng pa'rasangeng ilau' nasiuppamo ri bataya. Allongnga'i le'leng puppu'a iraja langngoto'i ba'leanga lau' sanggenna silariimi na'tuda anrabai bulenga lau' ruang alloji rabbana nanrabba todo' kaju erasaya ri Doa'. Anrabba le'leng puppu'a raja ruang allo to'ji allonna nunrabba kaju erasaya raja ri Bohong Lohea. Anu inni karebana pa'nganro allalloa.

Arifuddin Guri Teteaka, Kajang

Kiassai ngase'mi intu gitte tuma'kamponga. Sininna kiitte mata. Sibatuna lino. Lino pammari-mariangji.

Somba suju', Cappa' uhuta, cappa' bangkengta
Mase, Tanuntung

kunaha-nahai, injo kamponga sirattang minto'ji ballo arengna, nasaba' ri diki-dikiku, tala sanna'ja susa a'boja kanre-kanreang, iareka bua-bua kaju, simpadaya kaluku, pao, lassa', sattulu, jara mele', lemo, na loheji pole maraeng. Injo kanre-kanre allo-alloa a'padaya berasa, baddo', tala ammalliji taua. Na lakulabbusimi caritangku kelong:

**Bosi bulaeng ri kampongnu,
Bosi batu ri kampongku,
Hajikang to'ji
Kampong kaasi-asiku.**

**Kaasi-asikumi injo kapang
Na nakapangma taua
Bija tangnga bija
Kupa' pada-pada ngase'.**

Bahrum, Jannaya Kajang

angkatutui kalenta. Nakke kunni-kunnina tala maenga ta'sala-sala ri pa'pasangngna turiolota. Ammula boheku sanggenna ampunna kunni-kunni, tuju lapisi tuhusengna.

Ammentengko ri tana esoa.
A'patantangmako ri cina gorja.
A'la'langko ri kahu-kahu tallasaya.
A'sanre'ko ri batang kalenna.

Pammarentata anrongta na ammanta.
Sabbarako nuguru.

Anrai' -rai'ko naalleko buttu'.
Kalau' -kalau'ko naalleko tompong.
Mantangko ri tangnga nasento'ko patokong.

Punta sallang sibokoi, teaki sirampe kodi,
Rampea golla, na kurampeko kaluku.
Anre' haji'ku, kodiku u'rangii.

Biasa riele nuanre' na'kulle a'parrang taua. A'ra' kaleai ampansulu' pa'kunrarendangna. Talia pa'tujungna **Sura' Kareba Bulu' Kuuppa** ampekkai apa-apa, manna nunahajua rajja' manna pammarenta. Mingka biasa riele' tau ampantama' sura' iareka karangang sollanna lohe tau a'kulle angngisse'i nunaare'a sala. Innimi niarengang **Pa'kunrarendang**, na kunni mae sura' na karangang battu ri tau nu'pa'sala tau maraeng iareka kalenna iareka pammarentana. **ARAMAKI TA'SIRIKANGI!** Kibalasaji sura'na taua; kialeangangi kalenta, na lanipantama' todo'. Nukibacaya ri lahara inni tania pangnguppama **Bulu' Kuuppa**, napantama'naji nunatarima. A'kunrarendmaki, mingka aramaki sirki punna riele' tau maraeng ampa'sala to'ki.

Riekija kapala desa ampakei atorang lamoro 22

Riekija kapala desa ilalang kabupateng Bulukumba ampakei atorang lamoro 22 (*undang-undang no. 22 =UU22*) taung 1998, passala BPD (*badan perwalkan desa* iamintu pa'se'reang pa'sambena desa). Pangngissengangna angkua BPD anre' na'kulle ta'lu'lu' nasaba' pilena rajja'a. Punna kamua injo, atorangna kapala desaya a'tantumi lohe panggaungang sala lanjari ri kamponga.

Siganrai riele' kajariang andattara tau pantarang desa la'tarima pambageang doi' pa'sare pammarenta mange ri tuane'a napa'kulle katallasangna, bottina nasarei sura' ma'nassana ammantang ri desana na'pabanyara. Riele' angkua: "Nakke a'banyaraa ruang pulo lima sabbu," riele' maraeng angkua: "Nakke a'banyara limang pulo sabbu." A'pa'se'rea kareba battu ri tau a'tarimaya doi' pa'sare pammarenta.

Riele' todo' kuuppa kareba kunjo ri pa'buntingangna Haratting angkua: "Riele' kodong ia sibilangang mami limang pulo sabbu natarima."

A'kuta'nanga: "Angngurai na sikunjo mamo natarima?"

Nakua: "Anre' kuisse'ji, pa' desa nikuta'nang. Tau pa'risi nitambai pa'risi'na ri kapala desaya. Lohe nadattara tau riele' napanjari tau kaasi-asi, ballo balla'na, lohe capinna, jarangna riele', motoro'na riele', sagena lalang balla'na. Sibale'na lohe tau kaasi-asi anre' nadattara."

Kajariang simpadanna inni riele' pa'samaturukang BPD na kapala desa. Sintoje'na anre'mo na'kulle nipake UU22, nasaba' riele'mo sambenna iamintu UU32 taung 2005. Pa'kunjungangna bulang Rumalla taung 2004 kunjo ri masigi'a ri desa Tugondeng napa'pilabbangangi ri tau lohea pammarenta Bulukumba. Riele' ngase'i kapala desa na lura, pajama PPN (*pajak pembangunan negeri*). Napai ri arengna bupati Bulukumba Drs. H. Mappigau Samma angkua: "UU22 passala BPD nilu'lu' nasaba' BPDa lohe ammanraki areng pammarenta, nisambe UU32 taung 2005."

Asiittea tallua kapala desa Borong, Muh. Sahib anggota BPD desa. Napai pa' desa Borong angkua: "BPD anre' na'kulle nilu'lu' nasaba' pilena rajja'a. Labbusupi hattunna UU22."

Angnera tulunga mange ri pa'sambena rajja'a (DPRD) kabupateng Bulukumba na bupati Bulukumba, a'pansulu' sura' kaassaangna anterea annaba. Annabai pangngaa'rangna kapala desaya angkua salai UU32 taung 2005, iareka annabai UU32 nilu'lu'na BPD?

Kipammopporanga, araki panrakii "pungkahata" na ara to'ki panrakii "rajja'a." Andi Mattaisseng, Herlang

Apaji sirattang nagaukang punna doktoro?

Kunni-kunnina ri tana Konjo anre' napada riolo ri sesena kagassingang. Loheiji tau a'lampa ri sanro punna riele' garringna. Riele' todo' ta'kariri' ri tu'balu' ile ri pasaraya sanggenna tappa' nahalli nutala sirattang iareka nutala riele' matu-matunna. Mingka kunni-kunnina ri massing-massing kacamatang riele' pa'tarileang, na biasa todo' riele' pasunti' na doktoro. Pila' malling pila' lohe tau a'lampa ri balla' garringa iareka ri balla'na doktoro niparessa siurang niilei, onjongpa isse' punna silappo oto iareka motoro na sanna' lombo loko'na.

Gitte ngase' asukkuru punna riele' doktoro macca nua'ra' ammantang ri kampong anjampai tugaring. Lohe tau anggu'rangii doktoro Wazis nusikurang taung allallo anjama ri Jannaya, Desa Lembanna Kajang. Biasa niare' doktoro dinging limanna, na su'rung kunni-kunni biasa ia nimangei punna riele' tau garring lalang na na'kulle naung ri Mangkasara la'tarile.

Nurie'a kunni-kunni ri Jannaya nikua doktoro Hussain Husni. Lohe nahaju nunjari bajung caritanna taua ri Kajang. A'nassami najamai jamaangna na naparessai tau garringa siurang ansarei ile nunaparallua. Mingka riele' bede' angkua: "Kurang haji' ile nasareanga; anre' napada nukupakea riolo." Maka nangaiji taua a'kunrarend iareka toje' riele' ile sirattang naia nunisareangai?

Riele' todo' bede' angkua: "Biasa anre'i ri balla' garringa Jannaya; passangma a'lampa ri anunna to'ji ri Kalimporo. Sinampe' kalea najampaia injoka lohe kamua kubanyara." Maka anre' na'nassa angkua sikura kibanyara? Maka anre' napada ri sibat Bulukumba? Maka talia ia niare' doktoro ri balla' garringa Jannaya?

Riele' maraeng bede' angkua: "Anre' najampaia punna anre' ku'bohong." Maka toje' injo? A'nassami riele' nikua sumpana doktoro angkua lanajampai sakulle-kullena iangase' tau nuparallua ri doktoro. Ante' pakua doktoro a'kulle akapile-pile tau nummangeiai?

Mingka nukaminang ampakamassei nyahaya iamintu napapakei bede' jamaangna salamang doktoro ampasai tau aminnahang ri ajarangna ri sesena agama. Maka toje' nunakuaya tau angkua: "Iangase' tau antama' ri kantoro'na laniparessa garringna, naukiri arengna, pammantangangna, na arengna bijanna pole, nampa namangei balla'na angngajarai injo taua iareka ampakata'kariri'i ri sesena nunangaia. Biasa to'i a'lampa ri Surabaya iareka ri Pakistang na nakeo' tau aminnahang a'pilajara kunjo mange. Ri aminrona injo taua, biasa na'lampa mange-mange anrui' tau nutala aminnahang ri ajarangna."

Mingka gitte kiisse'i bateta tau Konjo a'carita. Biasa riele' annaba mingka lohe todo' natamba-tambah. Naia ri sesena nunaajaranga doktoro Hussain lohemi tau aminnahang. Kiparessai palakara inni. Maka nagaukangi to'ji nunaajaranga tau maraeng? Apa kasabbiangna tau nunaparessaya? Kikuta'nang sai urangta, turampi' balla'ta, bijanta. Anterea annaba, anterea sala carita ri sesena doktoro Hussain injo?

Taba', ri seseta gitte, doktoro Hussain, injo karebaya nipa'se're na nipantama' kunre. Kipansulu' pa'pihalinta ri sesena kunrarendngna tuKonjo. M.A. Kajang

Lanibage Bulukumba anjari rua?

Kaminang parallua lanigaukang ri Bulukumba kunni-kunni iamintu pa'samaturukang antungkului pammarenta nunipilea ri rajja'a. Gara-gara injo na gitte paranta tau Bulukumba paralluki a'samaturu' angkua apa lanagaukang pammarentata simata-matai kahajikang. Tala a'kullemaki a'pada riolo angkua riele' Bulukumba bara', riele' Bulukumba timoro. Kamua to'ji riele' kareba angkua lanibage Bulukumba anjari rua kabupateng. Punna niitte luara'na na lohena rajja'na a'kulle minto'ji, mingka punna nibagei a'kulleji a'panai' katallassang iareka anre'? Si'raka maengi nibage napilla' kaasi-asi'ja taua. Parallui nipikkiri haji'-haji'.

Dahumi rolo' kasampangang bupatita ampadakkai nulanagaukanga sallo' (*visi na misi*). Araki a'raki na kompa-kompa taua, ka kullei kapang riele' parallu kalenna, mingka rajja' napantama'. Pangnguppaku nakke, M. Carda Patawari, SE, MSi (*Sekretaris KKB Pusat Makassar*), tala sirattangpi Bulukumba lanibage rua punna niittei battu ri sesena katallasanga. Ibara'na assele lamung-lamung, assele tamparang, assele olo'-olo' tala riele' a'tantu.

Punna a'ra'ki a'bage kulle kapang kaminang haji', bagei rolo' kacamata. Padaai Kajang a'kullei nibage rua. Kamunnina ri Kajang sampulo ansalapang desa. Kajang bageang kalau' antama'i Tana Jaya, Laikang, Lembanna, Lembang, Lembang Lohe, Bonto Rannu, Possi' Tana, Lolisang, Pantama, Mattoanging. Kajang bageang anrai' antama'i Tambangang, Bonto Biraeng, Sangkala, Bonto Baji', Tana Toa, Malleleng, Batunilamung, Pa'tiroang, Sapanang. Kacamatang apa arengna ibara'na ta'bagei tala parallupi, sallo'pa nampa nidahu areng. Mingka punna a'kulleji, jakomo bagei Kajang ka riele' sajarana. MCardaP, Mangkasara

Palakara sala ukkuru tana

Kajariang ri dusung Saukeng desa Singa Herlang, Mustamin Benda anjamma' ri pammaressaang Polres Bulukumba bulang sampulo anse're, nasaba' napangngarekii riele' allukka'i tananna. Na injo tananna luara'na annang pulo antuju are ilalang ri sura' pambanyarang sima tana na pambangungang (PBB) mulai taung 1967 sanggenna 2002. Nilukka'i tananna Mustamin Benda tallung pulo anrua are taung 2003 maengna niukkuru tanaya.

Napai Mustamin ri pulisia: "Nalukka'i tanangku iMallaheri Jumba situru' kapala dusungku napajama ukkurua." Hattunna niparessa ri pulisia Mustamin nipangngeraii botti ma'tungkana ia pata tana. Mustamin naerang ngase'i na'piitteang bottina battu ri pammarenta konjo ri pulisia. Mallaheri Jumba nipangngerai botti ma'tungkana ia pata tana ri pulisia, anre' manna sibi'nye pantarangangna pambanyarang sima tana. Iami inni botti lukka'na tana nasaba' anre' botti ma'tungkana ammake tana battu ri pammarenta. Na injo tanra pambanyaranga taung 2003 maengnapa niukkuru tanaya.

Maengnamo massing niparessa ri pulisia tunilukkakia siurangang tau samaturu'a a'lukka' tana na sabbina nakiringmi pulisia mange ri jassaya Bulukumba. Sanggenna nipanaung karebaya mange ri tau lohea na'kulle angnguppa pangnginnyarang ri tau lohea anjari pa'paing' piti gau'-gau' iangase' kapala dusung.

A'kuta'nanga lohe ri Mustamin: "Hattunna niukkuru tananu, riele'jako?"

Nakua: "Rie'ja. Situru'ji luara'na ri sura' rentea, anre' sisalana annang pulo antuju are."

AM: "Antere'i pakua sikalinna ta'pinra?"

MB: "Mangei naukkuru sobbu-sobbu ri banggina sipa'tallu."

AM: "Inai injo tau tallua?"

MB: "Mallaheri, kapala dusung na paukkurua."

AM: "Nai arengna paukkurua?"

MB: "Mustamin Suefi battu ri Bantaeng."

AM: "Apa saba'na a'ra' kamua Suefi angngukkuru poleangi numaeng naukkuru?"

MB: "Hattunna niparessa ri pulisia napai nisare doi' sibilangang sabbu rupia, kapala dusung sibilangang limang pulo sabbu rupia. Napai Suefi: "Nakke angngukkuru pa'suroangna pammarenta, iamintu kapala dusung Saukeng."

Kajarianga sumpae' sintoje'na anre' na'kulle jari, saba' riele'pa sura' pa'samaturukang rua-rua sabbu kapala dusung, kapala desa sanggenna cama'. Riele' kajariang palakara tana pa'sabakeng panggaungang sala kapala dusung, nasaba' riele' kaa'rang angnguppa doi' sobbu-sobbu battu ri sihalia. Kaa'rang maka rua, a'ra'i a'pasisala rajja' siurangang a'pahuno rajja'. Apa pole inni kajarianga lombo Bahokaraeng lompoang batena la'pasisala iareka la'pahuno nasaba' tau siana' tungku' Benda na iJumba bahinenna Mallaheri.

A'rakijaki ammake pakeang jammang? Inai sala panggaungang ia urangku.

Andi Mattaisseng, Herlang

Anre' siri'

Se're jamaangna pammarentata kaminang ratea (*nasiona*) aggenna rahaya iamintu ampakasagenai rajja'na. Sollanna rajja'a tala a'tallasa kaasi-asi lantang kassi'. Ia injo nikua kasagenaang iamintu a'ra'i angnganre riele' nanakre, a'ra'i ammakeang riele' napake, riele' balla'na napammantang.

Punna bicaraki tau kaasi-asi ri pa'rasangeng Konjoa sikiddi loheji tau kaasi-asi lantang kassi', na tala riele' pole a'ra' niare' tau kaasi-asi. Iajja lohe ri pa'rasangeng tau kulture, anre' nara' anjama. Mingka punna a'ra'jaki anjama na lohe koko iareka galung a'kulle nijama, punna anre' kokonnu a'kulleko annesang ri turie'a kokonnu. A'kulle to'ko aminnahang anjakkala juku' ri tau riele'a kappala pajakkala juku'na, kulle to'ko pole a'boja jama-jamaang maraeng.

Suka'na riele' nikua pa'sambena doi' ri sesena nipana'ni ballinna bensing battu ri pammarentata mange ri tau kaasi-asi lantang kassi'a doi' tallung bilangang sabbu na tallung bulang (Rp 300.000) lohemi tau na anreki siri'. A'ra' ngase'i angnguppa doi' battu ri pammarenta, iami injo na napantama' to'mi kalenna angkua tau kaasi-asi. Riele' todo' tau a'jallo'i mange ri desana ka tala nipaupai. Sintoje'na tau nu'kullea angnguppa tau kaasi-asi lantang kassi'aji battu'na tau anre' kaleaji apa-apanna. Mingka ka anre'mo siri'na a'ra' to'i angnguppa doi', na riolo anda kalei nipanguai tau kaasi-asi, kabiranna a'jallo' punna riele' ampangkuai. Ka riele' ri pa'rasangengta na pa'rasangeng maraengna tau pakulle angnguppa na riele' todo' pajama pammarenta (PNS) angnguppa.

Parallu pammarentata napa'nassa tau kullea angnguppa ka lanibanyarami isse' maka pinruangna. Nu'kullea angnguppa ia minto' tau kaasi-asi lantang kassi'a. Ia tau pakullea pa'rie'i siri'nu.

Tallung buangangi nikua siri' iamintu: anre' siri', tappela' siri', na siri'-siri'. Ribokopi isse' nampa kubicarai siri' maraenga. Carda Patawari, Mangkasara

Lukkakang na pannobokang olo'-olo'

Ri bangnginna aha' tanggala ruang pulo allima bulang sampulo anse're 2005 narie' kajariang pammongkarang balla', iamintu balla'na niare' iRustam Hajji Asmawati, ammantang ri Lolisang Kajang, na'paguru ri SMPN3 Balagana Kajang.

Injo bangngia anre' rie' tau a'bangngi ri balla'na, a'lampai a'bangngi ri balla'na tau toana ri Laikang, mingka rie'ja balla'na ri ampi'na, balla'na to'ji tau toana iAsmawati niare' iHajji Rasyid.

Pangngare'na russana'na iamintu iSudi, nakua: "Injo tau lasalaya akkala'na iareka palukka', pa'kapang nampai uru bangngi na nagaukangi kedde' jama-jamaangna iamintu tette' salapang ansitangnga, nasaba' inakke amminroa kapang tette' sampulo ri bangngia, na anre'mo tau nahuntulang, iareka na kulle kapang nalangngere'na motoro'ku na allari ansulu', sanggenna anre' nanjari angngalle balu'-balu' na numaraengangnaya."

Injo to' bangngia na nitobo'i capinna ipuang Nurdin Dari' ri ampi' balla'na to'ji iRustam, naallena upa' nasaba' anre'ja namate. Mingka nakua iRustam: "Inni lukkakanga ri Lolisang, anre'pa namaling, nampami rie' tangnga ganna' labbi ri tallung bulanga." Mingka nakua: "Abangnga'a inakke nasaba' bangngibangnginaji nigaukang rundaya, iamintu tau a'rerang ri bangngina na ammiti'-miti' ri dallekang balla'na taua."

Sanna'mi ballona kedde' pammarentana iamintu kapala desana pa' Bahri, nasaba' nasuroangji taunna aronda bangngibangngina na napa'lebbasang, mingka natabaia pa'kuta'nang: inai ampiitteangi tau palukka'a iareka tala salai akkala'na angka kunjo ana' taunna? Maka injo palukka'a tau ilalang kampung to'ji iareka tau a'jojjo' ilalang kampung?

Nasaba' nakua pa'pasanga ri tau rioloa angka: "Anre' na' kulle bannanga antama' ri care-care nijai' a' punna anre' jarungna."

Mingka nipikkiri isse' angka a'pakua' ngase' injo? Gara-gara injo na a'kulle kapang naitte tau rie'a apa-apanna paralluki atutu na massing kijagai apa-apanta, nasaba' punna tau maraengaji lakirannuang nakulle kapang a'kulleki nilukkaki. Nursalam KJ

Lukkakang capi isse'

Rie'mi ri ruang bulanga ri Kajang sangnging lohe lukkakang na anre'pa namaeng rie' niuppa tau a'lukka'na.

Pa'pada ri bangnginna sanneng tanggala sampulo angkarua bulang sampulo anse're 2005, na nilukka'i capinna iRasyid amuru'na labbi limang pulo taung ammantang ri Tudonggo dusung Tocidu desa Mattoanging Kajang. Lohena capinna nilukka' iamintu limang kaju, rua anrong na tallu ana', nitassere karugiangna labbi sampulo juta rupia.

Hattu nilukka'na nakulle kapang tette' se're ri tangnga bangngina. Na iapa nisa'ringi bunganna tette' rua ri bangngia. Nasa'ringnami injo natappa' ambaung na nahojai apa-apanna iareka narabbanna, na naitte anre'mo apa-apa capi ilalang, alleang a'paturungmi ri pasampikang balla'na angka: "Anre'i capingku."

Sanggenna ia memang injo hattua na'lampa a'tula' mange-mange allante pole ri tette' annang ri karahie'a, na anre' apa-apa nauppa manna kedde' sikajuja. Nursalam KJ

Ana' SMP nalappo motoro

Ri allonna kammisi tanggala ruang pulo angngappa' bulang sampulo anse're 2005, ri ammono'namo ana' sikola SMP N1 Kajang, rie' sitau ana' sikola, galasi se're bahine niare' Samsinar. Amminronamo battu ri sikolana, narapi'i dallekangna masigi' lompoa ri Kassi, a'sengkami ammari-mari ka hambang kaleai alloa. A'tajangi oto pete'-pete' lanadongkoki amminro mange ri balla'na ri Ta'rongkolang, rua kilometere battu ri sikolana.

Tala mallingi a'tajang oto, rie'mo oto pete'-pete' la'lampa ansulu' ri a'rungang mangea ri labuanga. Na napaantangmo injo otoa. Naia ammantangnamo otoa, numarimi injo iSamsinar la'dongko' ri otoa. Tala naittemi rie' motoro oje' battu ri labuang, numari lassiri kalea, nanilappomo iSamsinar ri motoro injo. Na'dabungmo naung iSamsinar ri batattana tere'a, ta'tuttu' ulunna ri tere'a na sobbolo ulunna, allari rarana, polong bongganna.

Na niallemo lapung ana'-ana' nalappo motoro nierang mange ri balla' garringa ri Padang-padang, mingka ka tala rie' doktoro, na anre' na'kulle najama pajamajamana balla' garringa. Nierangi isse' anrai' ri balla' garringa ri Jannaya, mingka kurangi pa'kakkasa'na balla' garringa ri Jannaya, alleangna tala nakullei najama doktoro ri Jannaya.

Nierangmi tarrusu mange ri balla' garring lompoa ri Bulukumba. Sanggenna ruang bangngi ruang allo ri balla' garringa ri Bulukumba na anre'pa nannya'ro. Na injo pamotoro allappoi, ri maengnamo allappo allarimi mange ri balla'na ri Possi' Tana. Na bangnginamo nampa niuppa ri pulisia, nanijakkalamo.

Punna niitete paoje'a ri Kassi, parallui kedde' pammarenta, pataya jamaang, napakahaji' atoro'na, ka lohe kale kuitte paoje', iapa na'kambiang motoro baganna anggoje'. Rie' todo' manna a'sapedaya tala naisse', iami inni tala na'kulle ammodo'-modo' ka malla'-malla'i a'dappo', labbipayu nikuaya pangngatorang a'dakkaya anggerang dongkokang ri batattana lompoa. Iami inni nalohe tau ri Kassi naerai ri pammarenta, amputtaiai jama-jamaanga injo, na napakahajiki atoro'na paoje'a. Ka kurang kalea atorangna paoje'a ri Kassi. Lapaduli KJ 12/05

Punna nihojai narabbanna tammaka nakullei kedde' napansulu' nasaba' ruang kamarai apa-apanna iamintu ilalang rabang samarayaji mingka pantarang pa'padamo rabang jangang nasaba' manna mintodo' jangang tala nakullei ansulu' labbipa nikua capi. Mingka injo rabang lalangna nampanna todo' nakaluppai napasa' na injo nupantaranga rante motoroji nipapakei rappo-rappo.

Nakua iRasyid: "Sintoje'-toje'na ammalling minto'mo nangngadangngadang iareka na a'ra' naalle nasaba' maengmi pole nakakka' rabang ri bokoanga mingka niare'ji asu lantama'. Bunganna ita'ji nisa'ring. Battuangna rie' mami ri tungngaa' rakang iamintu Puang Karaeng Alla-taala."

Na inni copia sintoje'-toje'na capi battu ri pammarenta na naparakai. Battuangna rugi rua-ruai, rugi pammarenta, rugi to'i tau a'parakai iamintu iRasyid.

Nursalam KJ

Kamateang gara-gara a'betaengi pamotoro

Allonna juma' tette' rua tanggala salapang bulang sampulo anrua 2005 rua pamotoro a'bittaeng mulai a'palari ri ampi'na kantoro desa Karassing a'lampa kalau' silappoi nalaloi sikiddi pammengkaeng annoranga mange ri Tombolo desa Bonto Barua Bonto Tiro.

Aso' nikahangangi ri allonna sattu. Muh. Said a'bangngii ri balla' garringa ri Tanuntung sibangngi nampa nikiring naung ri balla' garringa ri Bulukumba nasaba' anre' nakullei doktoro'na pa'tarileang (PusKesMas) Tanuntung. Lohe tau angka anre' na'kanre ilea nasaba' numaeng angnginung tua'.

Kupuanug karebaya mange ri tau lohea, barang a'kullei naronrong pammarenta siurangang pulisia nasaba' tinroi kapang, sitinaja anre' na naitte panggakang pangnginung tua', kabotorang siurangang pa'lukkakang ri kampunga. Sitoje'na pammarenta siurangang pulisia anre' na'kulle a'piara tallu gau' iamintu: inungang pammanraki, kabotorang pammanraki, na lukka' pammanraki. Tallu pambajiki battu ri pammarenta siurangang pulisia, iamintu pangnginnyarang, pangngajari, pa'kalarro.

Andi Mattaiseng, Herlang

Sahi pagaea mate

Muhammad Basri ana'na iKade, kamanakangna ipuang Manro', amminahangi anjari sahi a'gae ri kappala niare'a Nuki. Ri allonna juma' tanggala sampulo anse're bulang sampulo anse're 2005, na amminahang a'lampa a'gae a'runng ngase' urangna. Patang bangngi lampana amminromi kappala napinahanga, nalantero ri labuanga kappala'na. Amminro ngase'mi urangna mange ri balla'na. Riekija allo narapa' kappala'na ri labuanga. Na bangnginapa narie' tau mange a'pau ri puang Manro' (purinanna iBasri) angka: "Matei Basri mate tallangi." Alleang a'lampami ipuang Manro' anghojai kamanakangna ri kappalaya, nahuntulangmi tala rie' tau ri kappalaya, anre' ruanna tau mateji iamintu iBasri. Na naallemo kamanakangna ipuang Manro', naerang mange ri balla'na, na naparakai sanggenna naahangang ri Pammololang desa Lembang.

Anjari pa'kuta'nang lompo ri bija-bijana tau matea iamintu:

- 1. Riekija allo nallabu kappalaya, angngura na bangnginapa na nipauang bijana?
- 2. Angngura na tala rie' kamua urangna angkammi'i ri kappalaya?
- 3. Nakua tallangi ri tamparanga, angngura na anre' naamboro battangna? Iami inni anjari jama-jamaangna pulisi ka lohe kaalla'-alla' ri kamateangna iBasri.

Kihoja sai inni, Pulisi, mate tallang toje'ji? Lapaduli Kajang

Hattu kantoro beru

Mulai tanggala se're bulang se're taung beru 2006 inni rie' hatu kantoro beru nituruki ri pammarentaya sibatu Bulukumba. Injo nigaukang situru' parentana bupatita.

Numallinga, limang alloji simingu anjama pagabea mulai tette' 07:30 sanggenna tette' 16:00, manna mamotala parrangi taua. Kunni-kunnina hatu kantoro a'pakunni:

Allonna sanneng aggenna kammisi na allonna sattu: timba' 07:30 tongko' 14:00 allonna juma': timba' 07:30 tongko' 11:00 Punna rie' parallunta mangemaki a'dalle'; rupa'na rie'ja anjamapaiki!

Arisang doi' na a'betaeng a'domeng

Ri Kalimporo bangnginna kammisi battuangna ri allonna rabai, tanggala tuju bulang sampulo anrua 2005, na nagaukangi amminro pole iamintu pa'ke'noang arisang. Lohena tau antama' arisang, tallung pulo anrua tau, na nipungkahai ri Hajji Juharta, anggota DPRD Bulukumba, battuangna tau a'kulleai angngerangi iareka ampalan-teangi sikuntu a'ra'-a'ra'na rajja'a.

Apa matu-matunna angngarisanga? Na apa todo' kodina? Punna nihojai angngarisanga, lohemi haji'na naia kodina ri sesena tau rie'a sagenana. Pangngare'na se're tau antama'a angngarisang, nipaumi angka iAnwar ammantang ri Bonto Rannu nakua: "Punna angngarisang taua, battuangna pa'padaji annanroa doi' ri banga, mingka nakua injo ri banga, punna rie'ki isse' aparallu, a'kullejaki a'lampa angngalle iareka a'pansulu', naia pangngarisangna, anre' na'kulle taua angngalle doi' punna tania taua nataba. Naia todo' kakodiangna, punna rie'maki aparallu ammake doi' na talia igitte ansulu' lamoro'ta na arengta."

Angngura narie' nikua pa'betaengang a'domeng? Lohe tau angngarisang mingka angngarisangji, battuangna punna maengi nigocang lamoroa na niisse'mi angka ianu nai' lamoro'na battuangna a'kullemaki amminro nasaba' anre'mo maraeng lanigaukang. Rie' todo' tau angngarisang, ri anre'na napa na nigocangi lamoroa, napa'dioloi rolo uttasa, a'sare pangngampe haji' mange ri iangase'na tau angngarisanga. Mingka inni nagaukang Juharta, maraeng to' isse' battuangna nagaukangi rolo' a'betaeng a'domeng. Inai-nai nataba a'nassami napa'sadialuanga taunna iamintu sikuntu nuniparalluanga, na maengpi isse' taua a'domeng, battuangna niisse'pi angka ianu lamoro se're, rua, tallu, appa' na lima nampa nigocang isse' amminro tau lanatabaya bulang ri dallekang.

Alamsyah KJ

Balla' a'kanre

Ri allonna salasa tanggala sampulo allima bulang sampulo anse're 2005, na'kanre balla'na iSembang. Amuru'na kulle kapang labbi patang puloa taung, pammantatangna ri Bontoa dusung Lembang desa Jojjolo Bulukumba.

Saba'na na'kanre balla'na, pangngare'na injo ri dannarina ambaungi a'pallu iangase'na sangka'-sangka'na nulana-eranga a'lampa ri kokonna.

Ri narapi'na ele' a'lampa ngase'mi ri kokonna, mingka injo bahinenna anre'pa na'lampa, nasaba' riekija tingang atasa' mingka anre'ja nalere sisalana. Ri tette' tuju a'lampa to'mi angngerang bokong ri kokonna, na injo apinna ri pallunna tappa' nahasaji nampa nahokoi.

Narapi'na tette' sampulo anse're, na rie'mo tau pasiampikang balla'na, angngitete apia nai' ri ata' jongki'na. Na nampami a'paturung a'keo'-keo' ri tau maraenganga. Sanggenna samaturungmi taua. Na rie' to'mo injo angngalle ere na nahasai, mingka anre' minto'mo na'kulle nipa'rang apia, nasaba' ta'bulu' ratemi.

Rie' to'mo injo tau a'lampa ampaturungi iSembang na bahinenna angka: "Amminromaki rolo' nasaba' a'kanrei balla'ta." Maengi injo massing amminro to'mi kodong, mingka apa nahuntulang ri allantenamo, iamintu balla'na siurang pa'kakkasa maraenganga, labbusumi nakanre api na anjari ahu.

Punna rie' pale' masse nyahata, kiringangang ngase'mi limanta, siurang kipakatanning ngase'mi atinta, na kitunrangi ri sesena katallasangna.

Alamsyah KJ

5. Pa'bica'-bicaraang Tallu Basa

(mingka se're pammahangang)

| Konjo | Malaju | Anggarisi |
|--|---|---|
| A: Inni alloa hambangi. | A: Hari ini panas. | A: It's hot today. |
| B: Ie', hambangi alloa, a'kulleki angngalloi pare. | B: Ya, panas matahari, kita bisa menjemur padi. | B: Yes, the sun is hot. We can dry rice. |
| A: Tallung allomi abosi na anre' narangko sassaangku. | A: Sudah hujan tiga hari, dan bajuku belum kering. | A: It's rained for three days now, and my clothes aren't dry. |
| B: Pahosi toje'mi inni. | B: Sudah musim hujan ini. | B: Well, it is rainy season. |
| A: Maengmaki allamung batara? | A: Apakah Saudara sudah menanam jagung? | A: Have you planted corn yet? |
| B: Ie', sampulomi allo. | B: Ya, sudah sepuluh hari yang lalu. | B: Yes, ten days ago. |
| A: Sikuranna na hattu angnganre barobbo'? | A: Kapan waktu makan sop jagung? | A: When is it time for corn chowder? |
| B: Bulang ruapi. | B: Nanti bulan Februari. | B: Next February. |
| A: Rupa'na lohe assele'na batara. Sanna' kungai nakke angnganre barobbo'. | A: Mudah-mudahan banyak hasil dari jagung. Saya suka sekali makan sop jagung. | A: Hopefully there will be lots of corn. I really like to eat corn chowder. |
| B: Haji' todo', mingka kunni-kunnina kialloi rolo' pare ri anre'napa nabosi isse'. | B: Baik juga, tetapi sekarang mari kita menjemur padi sebelum hujan lagi. | B: Yes, that's good, but now we should dry our rice before it rains again. |

Tappu - Tappu

- ◆ Sikurai punna rua a'pase're; tallu a'patuju?
- ◆ Jarang kidongkoki na ruku' pute nakanre. Apaya?

Pa'pihalinna tappu-tappu palanga nurie'a ri sura' kareba rioloa.
 Tau nubungasa angngerang assele'na mange ri kantorona Bulu' Kuuppa iamintu Hamsia nummantang ri Bontoa.



andallekang ri karaenga. Nikuta'ngami tuloloa angkua: "Angguai kau nuballo-ballo kamua na nulallo ri ampi'na ipung tukang, na ta'bessolomo palu-palunna, na tala jarre'mo pakunna taralina tontongangna ilaburoto', sanggenna a'dabbung ipalukka' na polong bangkengna?"

Napihalimi tulolo ballo-balloa angkua: "Injo kaballoangku, naa'arakangi tukoasaya, mingka katambaangi kaballoangku, ka bajungku na kasumba eja itukang minatua."

Nasuromi isse' joa'na karaenga angkeo'i tukang minatua. Sanggenna nierangmi tukang minatua mange andallekang ri karaenga. Nanikuta' nang angkua: "Anggurai na nukasumba eja inni bajuna tulolo, katambaangmo ballo-ballona, na ta'bessolomi palu-palunna lapung tukang ri napakuna taralina tontongangna ilaburoto', sanggenna tarubbu'mi taralia nakantiangna ilapalukka', na'dappo'mo na polongi bangkengna?"

Apaji naanre'mo na'kulle a'pihali tukang minatua. Apa saba'na? Sanggenna natappukangmi karaenga angkua iami inni poko' salaya. Nakuamo ri joa'na: "Erangi tukang minatua inni mange ri tarungku na nugentung ri babana tarungku sanggenna mate."

Nierang toje'mi tukang minatua mange ri tarungku lanigentung, mingka injo tukang minatua sanna' tinggina na babana tarungku bodobodo, alleangna anre' nanjari nigentung, ka rapa'i bangekengna ri tanaya.

Amminromi joa'na ampauangi karaenga angkua: "Tala a'kulle ta'gentung tukang minatua ka tinggi ta'laloi."

Nakuamo karaeng: "Mangeko a'boja tukang minatu nubodo-bodoa nu'kullea nigentung ri babana tarungku." A'lampa toje'mi joa'na karaenga a'boja tukang minatu nubodo-bodoa nu'kullea nigentung ri babana tarungku.

Rie' upa'na anre'mo nauppa joa'na karaenga. Posoi joa'na karaenga a'boja tukang minatu a'kulle nigentung ri babana tarungku, na anre' nangnguppa. A'sengkami ammari-mari ri tujunna kaju lompoa na ampansulu' kaluru'na na antunu. Puppusu kaluru'na puppusu to'mi caritaya.
 Syurkati, Kajang

Kipakemi kasampangang haji' inni a'pilajara basa Anggarisi? Maengi kiapele pa'bica'-bicaraang maka se'rea sanggenna maka appa'a? U'rangimaki angkua larie' pa'rannu-rannu nauppa tummuntulua lamoro se're na rua na tallu angngapele sampulo pa'bicaraang basa Anggarisi. Na inni pole, inai-nai angngapele iangase' pa'bicaraanga langnguppa kamaccaang ri sesena basa Anggarisi nusanna' parallua ri sibatu lino.

U'rangi todo', punna rie' pa'bicaraang batu ri gitte iareka na batu ri gurunta, palante sai ri sura' kareba **Bulu' Kuuppa** na kinanro ri kantorona ri Jannaya, Lembanna, Kajang. **Maemaki angngapele!**

Lappara: Tappu-tappu palang

1. ___ nuhaju?
3. nubiasa nadongkoki punna a'lampa tau ri Mangkasara
6. lohe _____ beru nihaju ri Bulukumba
9. biasa napanraki raung bue
10. basa Anggarisi: tau pata
11. basa Anggarisi: ___ apple (battuangna se're)
12. basa Anggarisi: ri
14. anre' nasahala iAnu
16. basa Anggarisi: a'lampa
17. Ku___i pao nulakualloia.
19. andaji
20. hujai tau punna lohe nainung _____
21. anunna lamung-lamungang nuraha ri tana
24. basa Anggarisi: annyara (Kusara mi tua'ku.)
26. nukaminang haji' niinung punna tangkasa
28. haji' batena allangngere iareka anjampai (jamaangna)
29. pada lamoro 11. irate
30. balinna pa'pau beru

Naung:

2. Tau la'lampa ri tana lompo, punna a'kullei, nangai a'baju _____ rolo' ri balla'na
3. basa Anggarisi: iareka
4. salama'maki ri _____ 2006
5. basa Anggarisi: irate ri
7. nunapakea capia punna nipa'nangkalaangi ri alla'na batarya
8. nubiasa napake tau ammolong papang
11. basa Anggarisi: purina (bahine)
13. caddi bangkengku; caddi ___ sapatungku
15. areng bahine
18. Anre' numangngang? ___!
21. tunisuro-suro ri karaeng hattu riolo
22. pada lamoro 1. irate
23. basa Mangkasara: anre'
25. basa Spanyol: se're
27. sibuangang bua; poko' kajuna lompo, mingka buana caddi

| | | | | | | | | |
|----|---|----|----|----|---|----|----|----|
| 1 | 2 | | | 3 | 4 | 5 | | |
| | 6 | | | 7 | | | 8 | |
| | | | | | | | | |
| 9 | | | | 10 | | | | |
| | | | 11 | | | | 12 | 13 |
| 14 | | | | 15 | | | 16 | |
| | | | | 17 | | 18 | | |
| | | | | 19 | | | | |
| | | | 20 | | | | | |
| 21 | | 22 | | | | | | 23 |
| 24 | | | | 25 | | 26 | 27 | |
| 28 | | | | | | | 29 | |
| | | | | | | 30 | | |

Inai-nai tau bungasa ammonei tappu-tappu palang inni na annaba iangase'i, ia langnguppa pa'rannu-rannu batu ri Bulu' Kuuppa punna naerangi assele'na mange ri kantorona Bulu' Kuuppa ri Jannaya, Lembanna, Kajang, ri ampi'na pa'talipongang Kartini.

Pa'phalinna Tappu-tappua irate

- ◆ [Lima. Battuangna: rua a'pase're iamintu rua a'pa'rappungang; tallu a'patuju, battuangna tallu a'pantama'.]
- ◆ [Pa'ka'ru' kalukua]

Karaeng Dongo' sala pangngatorangna

Riolo ri se'rea kampong ri Afrika ammentai se're karaeng nudongo' mingka porei na ammeha. Anre' barani angngehai. Ia arengna niare'i iKarakuos.

Rie'mo se're allo namange a'parapa' sitaua palukka' na nakua ri karaenga: "Inakke jama-jamaangku allukka', mingka sihangngi a'lampaa allukka' ri balla'na laburoto'. Naia lanteku ri balla'na kuambi'mi rinring balla'na, na ku'kantiang ri tontongangna, mingka taralina tontongangna tala kaddoro pakunna, na tarubbu' sanggengku a'dabbung napolongmo bangkengku."

Nakuamo karaenga ri joa'na: "Mangeko keo'i ilaburoto' urangi mae." A'lampami joa'na nakeo'i laburoto'

naerang mange ri karaenga andallekang. Nakuamo karaeng dongo'a: "Anggurai kau laburoto' nagara kamua tontongangnu, nalantama' inni lapa-lukka' ri balla'nu nadappo' na polong bangkengna?"

Nakuamo laburoto': "Tabe', karaeng, nakke taliaa tukang, iami injo na injo tontongangku kusuro jamai ri tukang, kusare guna sikura naeraya, mingka tukang to'ji kodi batena anjama na dappo'mi ilapalukka' na polong bangkengna."

Nasuromi isse' joa'na karaenga angkeo'i tukang. A'lampa toje'mi joa'na angkeo'i tukang, naerang mange andallekang ri karaenga. Nikuta'ngami lapung tukang angkua: "He tukang,

angngurai na kodi batenu anjamai tontongangna ilaburoto', na lantama'i lapa-lukka' ri balla'na ilaburoto' na tarubbu' tarali tontongangna sanggenna a'dabbung ilapalukka' na polong bangkengna?"

Nakuamo lapung tukang: "Bateku a'ra' ampakahaji' bateku anjama, mingka ri hattunna kupaku injo taralina tontonganga, situjuangi rie' tulolo ballo-ballo a'baju eja allallo ri a'runanga. Na iami injo kuitte-ittei sanggenna ta'bessolo palu-palungku, na anre' naterasa a'kanre pakunna."

Nasuromi isse' joa'na karaenga a'lampa anghojai injo tulolo ballo-balloa. Nibodoi caritaya, niuppami tuloloa sumpae' na nierang mange

Napantamaki taung beru 2006

Bangngi taung berua, lohe pa'se'reang ana' buru'ne na nagaukang pa'roa'-roakang. Ri Kajangmo bahang rie' tallu pa'se'reang tau tabbala. Ri Kassi nagaukangi pa'betaeng a'kelong ri rambangna labuanga, na nacidongi kapala pulisi Kajang.

Ri kilo lima desa Lembang, a'simataji nagaukang iamintu pa'roa'-roakang nasaba lanipantamakinna taung berua rua sabbu annang. Pungkaha pagaukanga iamintu Andi Budiman na pa'sambena niare' Hamzah Ismail, na poko' pa'gaukangna iamintu: "A'samaturu' ri kahajikang siurang ri pasingaiang."



Lohena doi' napake iamintu rua juta ruang bilangang sabbu rupia, narie' pa'sare kale-kalenna bupati AM Sukri lohena se're juta allimang bilangang sabbu rupia.

Papakasinara pangngatorang

Nakua tau maccaya: "Punna pangngatorang anjari pammarenta ri kamponga, a'nassa sannangi kamponga, anre' tau sipa'dongo'-dongo', lerei pasisalaanga. Mingka punna pangngatoranga anre'mo nipakalabbirii, a'tantumi panra'na tutabalaya. Anjarimi rangka sibatu kampong. Inai-nai dodong anjarimi kanre-kanreangna tukaddoroa, padami olo'-olo' ri boronga, nai-nai kaddoro iamo pabeta."

Iami injo na pammarenta kabupateng Bulukumba nahajui se're pa'se'reang (*tim*) papakasinara pangngatorang (*penyuluhan hukum*) a'se're ammangei ta'se're-se're kacamatang ri Bulukumba, a'pakasinara iareka a'pau ri tutabbala ri sesena pangngatorang nipakea ri sikuntu Indonesia.

Ri allonna salasa tanggala sampulo allima bulang sampulo anse're 2005, ri sikolana SMA Kajang nipabattumi pasititang papakasinara pangngatorang battu pa'se'reang papakasinara pangngatorang kabupateng Bulukumba, nunipanjaria battu ri:

- Polres Bulukumba (pulisi)
- Jaksa Bulukumba (kajassaang)
- Pengadilan Negeri (pangngadelang)
- Penghapelan Agama (bageang agama)
- Kabag Hukum Pemda Bulukumba (bageang pangngatorang hukkung)
- Badan Pertanahan Nasional kabupaten (pangngatoro'na tanaya)

A'sarei papakasinara pangngatorang mange ri labbi limang pulo tau, tungngup-paya pa'keo', iamintu:

- Kapala desa/lura ri Kajang
- Kapala iangase' sikola ri Kajang
- Tunilanggere ri kamponga
- Tunilanggere ri sesena agamaya
- Ana' sikolana SMA Kajang

Mingka rie' sikidi nipa'sassalang, ka rie' nuparallu kedde' niko' mingka anre' niko'i, iamintu bansana pulisina Kajang, jassa na tantarana Kajang, iangase' injo parallu a'pa'nassa ri sesena pa'kuta'ngana tau a'kuta'ngana ri sesena kajarianga ri Kajang. Mingka anre' niko'i (nibirittai), anre' to'mo intu nabattu. Nibirittai injo pada kapala desaya, talluji kapala desa rie'; lura se'reji; onjongpaya punna anre' minto' niko'i.

Iangase'na pa'se'reang papakasinara pangngatorang a'pa'nassa ngase' massing-masing jama-jamaangna, padaimi:

Battu ri pangngadelang nagara nakua: "Palakara rie'a antama' ri pangngadelang

Battu ri kantor pa'sambe rajja'a (DPRD) Bulukumba iamintu se're todo' juta allimang bilangang sabbu rupia. Battu ri kantor pammarenta daera Bulukumba limang bilangang sabbu rupia, na battu ri pa' cama' Kajang Abd. Wahid Jalil sibilangang sabbu rupia.

Mingka ia to' isse' ia ri kilo tuju desa Bonto Rannu, nunagaukanga niare' "Pa'se'reang ana' buru'ne Bonto Rannu" na nipungkahi ri Andi Rukman Embas, na pa'sambena Andi Sudirman, pagabe kagassingang Lembanna Kajang.

Lohena to' isse' doi' napake appa' juta rupia. Na rie' pa'sare battu ri tau tabbalaya tallung bilangang sabbu rupia, na battu ri pammarenta bupati Bulukumba salapang bilangangna sabbu rupia, na maraengangna injo nakadoi' poko' tau anggauganga.

Apa matu-matunna na nagaukangi pa'roa'-roakang?

1. Bara' a'kullei ana'-ana' buru'nea a'piitte gau'-gau' kaminang haji'a na anre' nikua pasimmaraengang, na kakodiang nyaha.

2. Bara' a'kullei nasalai sikuntu ampe-ampena nukodia ri katappusang taung rua sabbu lima.

Nursalam KJ

nagara kunni-kunnina iamintu palakara kasalaang lombo (*pidana*) na palakara pasisalaang apa-apanna tau (*perdata*). Ilalangna pasisalaang palakara apa-panna tau ia kaminang lohea iamintu palakara tana. Apa saba'na? Ka lohe tau manna anre' nahaji' sinara tanana napolisalaanga na parapa'ji mange ri pammarenta sanggenna mange ri pangngadelang. Naia palakara tanaya nusanna' terasa'na a'pa'tantu pupata tana iamintu nikuaya sura' pupata (*sertipikat*). Lohe tau a'pulo taungmi najama tanana na anre'pa nahaju sura', ka anre' naisse'i a'pasilalongangi, nampa pole tinggi ongkoso'na. Rie' todo' anre'pa namaeng nibageangi ri tutoana sanggenna mate."

Nakua pole pa'bicarana battu ri pangngadelang nagara angkua: "Punna rie' palakara ri desaya iareka luraya bara' a'kulle nipasitujui na nisare sura' pasitujuang bara' a'kullei anjari pa'pikking ri hakinga punna se're hattu na ni'papalakaraangi pole injo tanaya. Padaya todo' pangngatorang ada'a a'kulle nipake a'pasilolongang palakara."

Padaya to'mi pole pa'bicarana battu ri pulisina Bulukumba: "Punna rie' palakarata na kiparapa' ri pulisia, parallui rie' nikua *Laporan Polisi*, na kinggera tanra battu ri tuntarimaya palakarata angkua maeng toje'ki aparapa', punna sanggenna tuju allo na anre' nanajamai palakarata, a'kulleki mange ampa'kuta'ngangi ante' pakua sanggenna kamaengangna palakarata."

Pa'bicarana battu ri pangngatoro'na tanaya napakasinari angkua: "Punna a'ra'ki a'baju sura' ara laloki a'pakei tunibanyara (*calo*), nasaba' a'kullei katambaang ongkoso'na, ka tantu a'ra' to'i intu a'sahala. A'tarrusumaki mae ri kantor'na pangngatorang tanaya ri Bulukumba."

Pa'bicarana battu ri pangngadelang agama, napakasinara angkua: "Pannikka-angtapa natoje' ri sesena pammarenta punna niukiri ri KUA. Punna anre' napakunjo, a'kulle nipa'saraeng, punna rie' tau a'battala. Padaya todo' pole nikuaya mana', parallu ta'se're tunrung ana' angnguppa ngase', nasaba' punna rie' sitau tala angnguppa a'kullei a'battala ri pangngadelang agama, na'kulle nipinrai iareka nipa'tanre' pa'bageang mana' maenga nahaju."

Lapaduli, Kajang

33 tau Kajang a'lampa hajji

Labbi 630 tau Bulukumba langgaugangi rokongna sallanga maka limaya, iamintu nagaukang hajji ri taung inni. Naia nikua hajji, talia angkua iangase'na tau sallanga nipa'paralluang a'lampa ri Makka nagaukang hajjia, mingka ri sese-naji tau sagenaya. Naia nikuaya sarena, lohe natuju battuangna, sarena ri sesena katappakangna mange ri Puang Allataala, sarena ri sesena kagarringangna, na ri pa'kullena balanjana.

Situru' kabiasaangna tau la'lampa ri Makka napa'manasikang ri balla'na ri anre'napa na'lampa. Tuju bilangangna tau na lohe kabattuangna a'pilangngeri uttasa ri pa'manasikang ri balla'na iNurman Banong ri Kalimporo desa Tambangang Kajang ri allonna aha' tanggala sampulo anse're bulang sampulo anrua.

Nu'sarea pa'pilajarang uttasa Hajji Patahuddin LC, tu'pa'guru ri Al Gazali Bulukumba, na a'pa'guru to'i ri pa'parakang tau garring (Akper Bulukumba), na ri Pasantereng Kalumeme pole.

Apa bungasa'na nacarita? Nakua, "Injo sintoje'na anggaugangi hajji, talia angkua pa'belo-beloanggi iareka na kaa'rakang niare', battuangna a'ra'naji niisse' angkua tau lohe doi'na." Na sannakiji pole lohena nacarita ri sesena rokong-rokongna hajjia.

Napa'manasikang todo' puang Rasyid ri balla'na ri Sumalaya ri tanggala ruang pulo anse're bulang sampulo anrua 2005

na nu'sarea pa'pilajarang iamintu dotoro Hussain nunjama ri balla' garringa Jannaya, Lembanna, Kajang, na nungai angngajara tau ri sesena pangngajarang sallang nuterasaya.

Rua sikalabini nunipau irate niurang pole lohe tau maraeng battu ri Kajang.

Alamsyah KJ

Ri allonna juma'a tanggala ruang pulo antallu bulang sampulo anrua 2005 ri masigi'na Nurul Furqan, pammarenta Kajang situru' kapalana kantor agama, nagaukangi naparurui tau la'lampaya ri Makka ang-gaukangi kahajjianga inni taung pahajji-ang. Iamintu lohena tau la'lampa tallung pulo antallu tau.

Nakua pa' cama' ri pa'pau pallappa-sangna, napasang ngase' tula'lampaya angkua: "Pahaji' laloi bateta anggaugangi pa'suroangna Puang Allataala, na kisituru'-turu' mange ri kahajjianga, na kijagai arengna kamponga siurang agamata." Jarimi tanggala tallung pulo ri bangngia, na'paruru ngase' lokoangna (*kloter*) bajung hajjina Kajang naung ri Bulukumba kota sanggenna tulusu' a'lampa nai' ri tana lompoa. Na niurang ri pa' cama' sanggenna Bulukumba.

Rie' upa'na bajung hajjina Kajang inni taunga anjari ngase' hajji ma'tungka (*mabrur*).

Syurkati KJ



Apa matu-matunna sura' kareba Bulu' Kuuppa?

Innimi se'rena ri sikuntuna lohe matu-matunna

Ammiti'-miti'i jannang karebaya ri sibatu tana Konjo ampa'nassai pa'tandingang a'karang na basa Konjo ri ruang pulo anrua SMP na SMA. Ri Karassing Herlang tappa' rie' sitau a'kunraring angkua: "Hajuangma kedde' bo'-bo' a'pilajara basa Konjo, nasaba' nusadiaya basa Mangkasaraji na tali ai basana ana' kunre ri Bulukumba." Nunggera-ngeraya Kasmat arengna, guru basa daera ri SMP Karassing. Ma'nassa battu ri sa'ranna angkua tala nabicara biloji.

A'pialii jannang karebaya: "Haji' todo' pangngerata, mingka aganyupi sura' karebaya, nampami a'kulle Yayasan Bulu' Kuuppa a'baju bo'-bo' na basa Konjo."

Alleang tungguru Kasmat anrurungangi jannang karebaya antama' ri pangngajarangna. Rie' tallu nu'pakata'bangka kunjo mange. Lamoro se're, rie' pa'gentung sura' kareba (pa'pada nurie'a ri siloheang hotele ri Mangkasara) nakunjo ta'gentung karua batunna SKBK. Nakua mo Kasmat: "Gara-gara anre' bo'-bo' basa Konjo, passangma ampakei SKBK bajung angngajarangi basa daera Konjo."

Numaka ruaya nu'pakata'bangka iamintu karang na basa Konjo numaenga naukiri ana' guruna Kasmat lamminahang ri pa'tandingang a'karang basa Konjo. Sikura lohena? Su'ring injo alloa ruang pulo anrua batunna nibilang. Nakuamo Kasmat: "Tali ai injo. Loheiji anre'pa nipantama'."

Numaka tallu nu'pakata'bangka iamintu ana' sikola pa'pilajarang basa daera to'ji. Ma'nassa battu ri tappana, rannu ngase'i ampilajarii basana to'ji. Rupa'na gitte pabaca SKBK a'kulle to'jaki ambacai bate haju limanna ana'ta ri SMP Karassing (na battu ri sikola maraengangnaya pole), nasaba' karang nukaminang ballo lanipantama' ri SKBK sallo'.

E pabacana SKBK ri sibatu tana Konjo na pantarangna pole, sampang ansulu'i isse' Bulu' Kuuppa hallimi na nubaca (sempo ba'lalo kapang: 2000ji rupia) na injo anjari bateta to'ji ampakaganyui sura' karebata. Nampa pole, angngukiriki sollanta anre' nibeta ri ana'ta.

Jannang Kareba